

सानसेयारि "बड'सा" ख्रौरांलाइयाव
समाजयारि जिउजो लोब्बा थानाय रायथाय, खन्थाय,
सल', सल'बाथा आरो दावबायारि थावनि, पार्क
बाइदिनि सायाव लिन्नाय लिन्दिबां दैथाय हर/
सानसेयारि "बड'सा" ख्रौरांलाइया खेबखानावे
फोसावगोब।

बड'सायाव लिन्नायवि हुबा खालाम,
"बड'सा" ख्रौरां, जो बयबो आंगो खालाम।

सानसेयारि बड'सा मावखुलि

माइबं नोगोर, जोहोलाव दैमालु लामा

कक्राझार, बिटिसि-783370

Website: www.bodosanewspaper.com

सानसेयारि बड'सा



BODOSA ★ A Bodo News Daily ★ Wednesday ★ 3 March, 2021 Kokrajhar, BTC, Assam ★ Vol.- 30, Issue No. 334 ★ R.N.I.Regd.No.40994/91, AssamGovt.Regd.No.IPRD.40/2006/13, ★Rs.8/-

हाग्रानि मैदेरजो
सासे गाथारजादों

कक्राझार, 2 मार्च: कक्राझार
जिल्लानि भारत-भुटान सिमना
ओन्सोलनि झारबारि हाग्रा
रेन्जिन सिडव थानाय दिग्लिपारा
खाथिनि 9 नं महेन्द्रपुर गामियाव
हाग्रानि मासै मैदेरा गामिन
सासे सुबुंखौ गाथारजादों

(□ 5 बिलाइआव)

बारग' एम एल
एनि रुंसारि
जानायखौ गिबि
मन्थिआ दुखु
फोरमायदों

दिसपुर, 2 मार्च: साबुवा
बियाबनि बारग' एम एल ए
ग्यान गगैनि रुंसारि जानायखौ
दुखु फोरमायदों गिबि मन्थि
सर्बानन्द सनवालआ। दिनें गांसे

(□ 5 बिलाइआव)

मिस आरो मिस्टार बि टि आर फेसन
दिन्थिफुंनयाया गाहामै खुंफुंजालांबाय

कृतिना मुसाहारि आरो ऋतिक बान्तियाआ देरहादों

कक्राझार, 2 मार्च: कक्राझार
बिगियान फरायसालिमानि
गेलेग्रा फोथाराव खुंनय मिस
आरो मिस्टार बि टि आर फेसन
श्व'नि जोबथा बादायलायनाय।
बि टि आरनि सिडव थानाय
मोनब्रै जिल्लानि
फरायसालिमानि फरायसुला-
फरायसुलिफोरा बाहागो
लादोंमोन बे बादायलायनायव।
कक्राझार बिगियान
फरायसालिमानि कृतिना



मुसाहारिआ देरहानायनि
मुखुदखौ मोन्नो हानायव

जाफुंसारो। बेनि उनाव नैथियाव
जनता सेरफांगुरिनि दिष्टि
बसुमतारि, थामथियाव
उदालगुरि फरायसालिमानि

(□ 5 बिलाइआव)

कंग्रेस दैदेन्नाय महाजतआ
बिटिआरआव मोनबो रोखोमनि
गोहोम खोख्लैनो हाया: प्रमद बर'

गुवाहाटी, 2 मार्च: मोनथाम खोलोबजों खुंनो लानाय आसाम
बिधान सभा बिसायख'थिनि थाखाय राजखान्थि दोलोफोरनि
राखा-फाराया गोखोंनिफ्राय गोखोंसिन जानो हमदोंसे। बे
बिसायख'थिनि बिटिआरनि गाहाय राजखान्थि दोलो इउपिपिएल
दोलोयाबो गुबुनफोरनि रुजुनायाव

(□ 5 बिलाइआव)

कक्राझार जिल्ला खुंथाया सासेबो
भटार थालाडैनि राहाफारि लादों

कक्राझार, 2 मार्च: कक्राझार
जिल्ला खुंथाया फेगो बिधान
सभा बिसायख'थिनि लोब्बायै
जिल्लानि सिडव सासेबो भटार
थालाडै बेनि सायाव गोनांथार
नोजोर होदों। दिनें जिल्ला

(□ 5 बिलाइआव)

आसाम बिधान सभा बिसायख'थिनि सिगां
प्रियांका गान्धिआ मोन 5 बिथांखि फोसावदों



गुवाहाटी, 2 मार्च: गेजेराव माखासे दानल' दंसे आसाम बिधान
सभा बिसायख'थिया। बे बिसायख'थिखौ नोजोर होनाने
मोनफ्रोमबो दोलो आफादफोरानो दासान्दि सुबुंफोरनि गेजेराव
थानाने फोसावदिनाय आरो मेल

(□ 5 बिलाइआव)

कक्राझार, 2 मार्च:
सोलायनयनि दोहौजों खुंथाय
गोहोयाव फेनाय इउ पि एल
दैदेन्नाय जुथाय बि टि आर
खुंथाया बे खेबाव गेनाखान्थिनि
हेंथायै गोखों राहा लानो सिगांदों।
मिबिथिनाय बायदिब्ला इउ पि
पि एलनि आइटिसि सेलनि
मावफारिया उत्तम कुमार बर'नि
मोनसे गसर थिसनयनि गेजेरजों
पुलिस खुंथाया दिनें बि टि सि
सेक्रेटारियेटनिफ्राय मोन 16 बेले-
बेजे गोनां फाइल आरो
डक्युमेन्सफोरखौ बोखाडो।
सुलुनि बायदिब्ला बोखानाय



बेले-बेजे गोनां फाइलजों
माखासे बिबानगिरि,
राजखान्थिगिरि, कन्टेक्टरफोर
लोब्बा थानो हागौ होनाने सन्देह
खालामनाय जादों। सोलिफु
बोसोरनि थानाय 28

फेब्रुवारीखालि उत्तम कुमार बर'आ
बि टि सिआव थानाय 2015
माइथायनिफ्राय बाहायनाय

रांखान्थि फान्डनि नुजाथिनाय
बेले-बेजेनि हेंथायै कक्राझार
पुलिस थानायवा गसर
थिसनाने नायबिजिनो दाबि
खालामदोंमोन। बि टि सिनि
गुबुन गुबुन बिफानफोर आरो
डब्लिउ पि टि आरो बिसि
बिफाननि गेजेरजों बाहायनाय
फान्डनि सिडव गोबां बेले-बेजे
नुजाथिनाय, गेनाखान्थि जानायनि
सायाव इउ पि एलनि
थाखाय डाक भट थामहिनबा

(□ 5 बिलाइआव)

इउ पि एल दोलोआ सुबुंफोरनि जौगानाय सार्थआव
बिसायख'थिनि उनाव खामानि मावनायनि बिथांखि आजावगोन

बासुगाव, 2 मार्च:
सोलायनयनि स्ल'गानजों बि
जे पि आरो गन सुखा पाटीनि
हेफाजाबाव खुंथायसिम फेनाय
इउ पि एल दोलोआ सिगांनि
होनाय बाथाखौ सिगाडाव
दोन्नाने फेगो बिधान सभा
बिसायख'थिनि उनावनो
दुलाराय राइजो-राजाफोरनि
जौगाखानाय सार्थआव खामानि
मावनायनि बिथांखि आजावना
लागोन होनाने मिथिहोदों इउ
पि एल दोलोनि मावफुं
आफादगिरि रेनगोरा नार्जारिआ।
दिनें मोनाबिलि समाव चिरां



जिल्लानि बासुगाव सहरनि
साखाथियाव थानाय
हेकाइपाराआव थानाय 27
फेब्रुवारीनिफ्राय सोलिबोबाय
थानाय श्री श्री नारायण पुजा
फोर्बोनि लोब्बायै मैया मोनानि

समाव खुंनय हारिसु हाबाफारिनि
मन्सखौ बेखेवना होनाने

वेबायदि बाथाखौ रायखानांने

(□ 5 बिलाइआव)

आसाम बिधान सभा बिसायख'थि 2021

गिबि खोलोबनि बिसायख'थिनि
थाखाय नटिफिकेसन फोसावबाय

दिसपुर, 2 मार्च: फेगौ आसाम बिधान सभा बिसायख'थिनि
गिबि खोलोब बिसायख'थिनि थाखाय दिनें सरासन्नायै
नटिफिकेसन जाइरि खालामनाय जायो। राइज्योयाव मोनथाम
खोलोबजों बे बिधान सभा बिसायख'थिखौ खुंनय जागोन।
गिबि खोलोबनि बिसायख'थिनि थाखाय नमिनेसन लाइ
गथायनयनि जोबथा अक्टवौ 9 मार्चसिम थि खालामनाने होनाय
जाबाय। अखानायै 10 मार्च अक्टयाव

(□ 5 बिलाइआव)

भेरगावआव दोंथाम लामा लुनायनि हाबाखौ जागायबाय

उदालगुरि, 2 मार्च: उदालगुरि
जिल्लानि भेरगाव बिटिआर
बियाबनि सिडव थानाय दरथाम
जायगायाव बावैसो पाक्का लामा
लुनायनि हाबाखौ जागायनाने
होयो बिटिआरनि लाइमोन
अन्साय आरो गेलेमु बिफाननि
मावफुं सोद्रोमा दावबायसा
बर'आ। मावफुं सोद्रोमा बर'आ
आसाम सरकारनि गुडउडल
मिसननि सिडव खाग्राबारि-
कलबारिनिफ्राय सिमलुगुरिसिम,



टंला-डिमाकुसि लामानिफ्राय
सिकारिखालानि 2 नं आमगुरिसिम
आरो 1 नं हारसापारा गुदि
फरायसालिनिफ्राय बरभाक जानाने

खाव सुमकासिम थानाय लामा

(□ 5 बिलाइआव)

लुरिनि ज्यतिखौ
गागलोबग्रा
दायनिगिरिखौ
हमनांगौनि दाबियाव
सोमावसारदों

कचूगाव, 2 मार्च: असम
जातीय परिषद सुंदयै ए जे पिनि
आफादगिरि लुरिनि ज्यति गगैखौ
गागलोबग्रा दायनिगिरिखौ
थाबैनो हमनांगौनि दाबियाव
राइज्यो नाडेनो सोमावसारनायजों
लोगोसे दिनें गसाइगावनि गेजेर
बाहागोयाव थानाय कमलनाथ
काम लाइब्रेरिनि लांगोनायाव 3

(□ 5 बिलाइआव)

भारतनि बिसायख'थि आयगआ बेंगुरा, बैसो गोरा
सुबुं आरो कभिड-19जों सन्देरजानाय भटारफोरनि
थाखाय पस्टेल बेलट बाहायनो थांखि लादों

गुवाहाटी, 2 मार्च: भारतनि
बिसायख'थि आयगआ
नेमखान्थि बादियै थानाय पस्टेल
बेलट बाहायग्राफोर जेरै
साखियाल, जरखा भटार,
बिसायख'थिनि बिबानाव
थानाय भटार, जायखि-जाया
आयेननि सिडव नोजोर बन्दि
जानाने थानाय भट डायफोरनि
अनगायैबो बे खेबाव गिबि
खेबनि थाखाय जरखायै
जाफुंसारै, 80 बोसोर बैसोनि
गोजौयाव थानाय गागि नोगोरारि
आरो कभिड-19 सन्देह' गोनां
एबा सन्देरजानाय भटारफोरनि
थाखाय डाक भट थामहिनबा



पस्टेल बेलटनि राहा खालामनाय
जादों। आर'जलाइ थिसनयनि
थाखाय गाहायाव रायखानाय
नुजाथिनो हायै भटारफोरनि
थाखाय पस्टेल बेलटनि

आर'जलाइ गथायनयनि
राहाफारि खालामनाय जादों।
नुजाथियै भटारफोर प्र-पत्र
12 (घ) नि गेजेरजों थिखानाय
बियाबनि रिटानि अफिसारनि

(□ 5 बिलाइआव)

गागि सिफुं दामग्रा
प्रभाद शर्मानि
रुंसारि जानायखौ
गिबि मन्थिआ
दुखु फोरमायदों

दिसपुर, 2 मार्च: गागि सिफुं
दामग्रा, दामजु सामलायगिरि,
सुबुं मे थाइ आरो नातक
अकाडेमि बाथा मोनगिरि प्रभाद
शर्मानि रुंसारि जानायखौ गिबि
मन्थि सर्बानन्द सनवालआ दुखु

(□ 5 बिलाइआव)

बर'-कसारि वेलफेयार अटनमास काउन्सिलनि
गाहाय मावखुलिखौ दिनें बेखेवबाय

सानजारि नोगोर सिमेन चापरिखौ गाहाय मावखुलि
आरो गुवाहाटीयाव दालाय मावखुलि बानायगोन

सिमेन चापरि, 2 मार्च:
बिटिआर गोजोन गोरोबथा
बादियै दाफुंजानाय बर'-कसारि
वेलफेयार अटनमास
काउन्सिलनि गाहाय
मावखुलिखौ दिनें धेमाजि
जिल्लानि सिडव थानाय

(□ 5 बिलाइआव)



जारगुरिआव इराजी फरायसालिनि
रुपाथि माइथाय फोर्बो फालिदों

गसाइगाव, 2 मार्च: कक्राझारनि जिल्लानि गसाइगाव महकुमानि
आसाम-सोनाव बंग' सिमायाव थानाय जारगुरि जिबलाल नार्जिनारि
एमलागेटेड गोजौ इराजी फरायसालिनि रुपाथि माइथाय फोर्बो
फालिथायखौ सानैनि हाबाफारिजों फालिनाय जायो। 1996
माइथाय दिनें सानाव ओन्सोलनि गागि सोलौंथायगिरि प्रबिन
इस्वारिनि बान्जानाययाव आरो जायगानि माखासे सोलौंथाय
अनफावरि राइजो-राजनि हेफाजाबाव

(□ 5 बिलाइआव)

कक्राझारआव हम गार्डफोरा
दाबि सुफुंनो 3 घन्टा धर्ना होदों



कक्राझार, 2 मार्च: आसामनि फोरेंथाय मोनय हुम गार्ड गौथुमआ
दिनें कक्राझार जिल्लायाव गुबुन गुबुन दाबिखौ लानाने मोनसे 3
घन्टा धर्ना होनाय हाबाफारि खुडो। गौथुमनि खमैबो 100 नि
बांसिन सोद्रोमाफोरा बे धर्नायाव बेनार, प्ले कार्डफोर लानाने
गावसोरनि साखिखौ रियुलार

(□ 5 बिलाइआव)

मुलुगनाडैनो करनार्जो 25.38 लाखनिखुडबो
गोबांसिन सुबुंफोरा जिउ गोमाबाय

वाशिंग्टन, 2 मार्च: मुलुगनि
गेजेराव कभिड-19 जों जिउ
गोमानाय सुबुं अन्जिमाया
दासिम 25.38 लाखनिखुडबो
बांसिन जाहैबाय। बेजों
लोगोसेयैनो कभिडजों
सन्देरजानाय सुबुं अन्जिमाया
दासिम 11.44 कौटिनिखुडबो
बांसिन जाहैदों। आमेरिकानि जन
हर्पकिन्स इउनिभासिदिनि
बिगियान आरो इन्जिनियारि



मिरुनिफ्राय मिथिहोनाय
बायदिब्ला मुलुगनि मोन 192

हादत आरो ओन्सोलाव
(□ 5 बिलाइआव)

गाहाय मन्थि मदिआ सोनाब बंगयाव 20 था आरो आसामाव 6 था रेलिफोर खालामगोन

नख'र राइज्यो मन्थि किसान रेडिआ करना भेक्सिन थुजादों, दिनैसिम हादतनि 1.48 कौटि सुबुडा देहायाव भेक्सिन थुबाय

कलकाता, 2 मार्च : गाहाय मन्थि नरेन्द्र मदिआ सोनाब बंगयाव 20 था आरो आसामाव 6 था रेलिफोर खालामगोन, जेराव नख'र मन्थि अमित शाह आरो बिजेपि आफादगिरि जेपी नड्डुआ सोनाब बंगयाव 50-50 था बिसायख'थि रेलिफोर खालामनायनि सेडयुल दं। बेनि जागाय जेनाया 7 माच4 ब्रिगेड मैदानयाव मदिनि रेलिजों जागोन। बे रेलिनि थाखाय बिजेपिआ 10 लाखनिफ्राय बांसिन सुबुंफोरखौ थुबुर जानायनि दाबि देखांदों। गाहाय मन्थि मदि, नख'र मन्थि अमित शाह आर जेपी नड्डुया सोनाब बंगयाव बिसायख'थि अंधियानआव पार्टि खौ सामलायदों। गाहाय मन्थि मदिआ थानाय 1 दानयाव 3 खेब सोनाब बंगखौ दाबायखांबाय। बेनि अनगायै बियो बिडिय कनफारेन्सनि गेजेरजोंबो माखासे हाबाफारियाव बाहागो



लाखांबाय। सोनाब बंगयाव बिधान सबा बिसायख'थिनि अक्टखौ शुक्र बाराव फोसावखांबाय। नाथाय बिजेपि तृणमुलनि गेजेराव थानाय 2 बोसोर निफ्रायनो जेना सोमजिदों। दुर्गा पुजा बादि धोरोमारि हाबाफारि खुनायनिफ्राय लानानै

रबिन्द्रनाथ टेगर, नेताजी सुभाष चन्द्र बसनि जोनोम साननि हाबाफारिनि गेजेरजोंबो गोबां राजखांथि हाबाफारिखौ थांखिनाय जादों। आथिखालाव बे दावहा नांनयाव मिरु सरकारनि सिबिआइ आरो राइज्यो सरकारनि सिआइडियाबो

हाबदों। खैला गेना खांथियाव ममता बेनार्जीनि बियादय अंधिषेकनि बिसिनो सिबिआइया नटिस दैथाय हरदों। राइज्यो सरकारनि सिआइडिया सोनाब बंगयाव बिजेपिनि दैदेनगिरि पामेला गस्वामीखौ कफिन केसयाव ग्रेफ्तार खालामदों।

गोदान दिल्ली, 2 मार्च : भारतयाव नैथि खोलोबनि करना भेक्सिन थुनाया थानाय समबारनिफ्राय जागायना फैबाय। हादतनि गेजेराव थानाय बैसोगोरा सुबुं (60 बोसोरनि गोजौ बैसौ)फोरनि देहायाव भेक्सिनखौ थुदों। 45 बोसोरनि गोजौयाव थानाय गोबां बेमारनि लोखोनजों जुजिनांनय सुबुंनि देहायावबो भेक्सिन होदों। नख'र राइज्यो मन्थि किसान रेडिआबो दिनै हाइद्राबादआव थानाय गान्धी देहा फाहामसालियाव करना भेक्सिन थुजादों। जेरा थानाय समबार, 1 मार्चखालिबो हादतनि गाहाय मन्थि नरेन्द्र मदिआ थुजादोंमोन। गाहाय मन्थिनि उनाव मिरु नख'र मन्थि अमित शाह, लेडाइ हादतगिरि एम भेंकेया नायडु, बायजोयारि मन्थि एस जयशंकर, एनसिपिनि सिफ शरद पावारजों लोगोसे गोबां राजखांथियारि दैदेनगिरिफोरा थानाय समबाराव



थुजादोंमोन। मिरु सावसि बिफाननि बायदिब्ला दिनैसिम हादतयाव 1.48 कौटि सुबुंनि देहायाव करना भेक्सिन थुबाय। करना भेक्सिन थुनायनिगिबि सानाव 1.25 लाख सरासन्ना सुबुंनि देहायाव करना भेक्सिन थुदों। मिरु सावसि बिफाननि बादिबैब्ला थानाय समबारखालि 60 बोसोरनि बांसिन बैसोनि सायाव 1, 28,630 करना भेक्सिनखौ थुनाय जादों। लोगोसे गोबां बेमारनि लोखोन

जुजिनांनय 45 बोसोरनिफ्राय बांसिन सुबुंनि देहायाव18,850 भेक्सिन थुनाय जादों। थानाय समबारखालि फुं नि 9.00 रिंगानिफ्राय नैथि खोलोबनि करना भेक्सिन होनायनि रिजेस्ट्रन जागायना फैदों। खम समनि गेजेरावनों 25 लाखनिबो बांसिन सुबुंफोरा कभिड पटैलआव रिजेस्टार खालामदोंमोन।

सौराम इनस्टिटुटनिफ्राय दिहुन्नाय कभिशिल्ड आरो भारत बाय टेकनिफ्राइ दिहुन्नाय भेक्सिन करना भेक्सिनखौ भारत सरकारा इमारजेन्सि थासारियाव बाहायनो गनायथि होदोंमोन। मिरु सावसि बिफाननि बादिब्ला, थानाय 16 जानुवारीनिफ्राय करनानि भेक्सिन थुनाय जाना फैदों। दिनैसिमाव गासै 1.48 कौटिनिबो बांसिन सुबुंनि देहायाव करना भेक्सिन थुनाय जाबाय।

मुलुगनि गोबां फरायसाफोरा गाहाय मन्थि मदिजों आन्जादनि सोमोन्दै सावरायनायाव बाहागो लागोन

गोदान दिल्ली, 2 मार्च : भारतनि गाहाय मन्थि मदिजों फैगोन मार्च दानाव फरायसाफोरनि गेजेराव आन्जाद होनायनि सायाव सावरायनाय जागोन। भारतनि फरायसाफोरजों लोगोसे मुलुगनि फरायसाफोरनोबो सावरायनायाव बाहागो लानो हानायनि सुबिदा दं। माखासे हादतनि फरायसाफोरनि हांखाइनाय आरो दाबि दैखांनयाव थिरांथा लानाय सावरायगोन हाबाफारियाव इउएस, फ्रान्स, ब्रिटेन, अस्ट्रेलिया हादतखौ लाफानानै



डजनसो हादतनि माखासे फरायसाफोरा बाहागो लागोन। सावरायलायनायाव बाहागो

लानो रिजेस्ट्रन खालामनो नांगोन। जेराव फैगोन 14 मार्चयाव रेजिस्ट्रसन सुबिदाय

जोबना फैगोन। करना भाइरास गोसारनायनि जाउनाव बेबारनि सावरायनायखौ अनलाइन खालामदों। अन लाइनआव सावरायनाय सुबिदा बादि खालामनो गोनोंखोनि हेफाजाबजों आरसुवेल अडिटरियम खालामनो थियारि खालामदों। बेनि थाखाय टेकनिकेल एस्कपार्ट हान्जानि थियारि खालामदों। मिरु सोलोंथाय बिफाननिफ्राय फोरमायनाय बायदिब्ला, भारतनि फरायसाफोरजों लोगोसे मुलुगनि गोबां फरायसाफोरनो सावरायनायाव बाहागो लागोन। लोगोसे सोलोंथाय आरो आन्जादजों सोमोन्दो थानाय सोंथिखौ गाहाय मन्थिनिसिम सोंनो खबु होगोन। आन्जादनि समाव जिंगा सिनायनिफ्राय

वारगनो हानायनि टिपस गाहाइ मन्थिया खालामगोन। गाहाय मन्थि फरायसाफोरनिसिम मोन 25 सोंथि देखांगोन। गाहाय मन्थिजों सावरायनाय हाबाफारिनि गेजेरजों आन्जादनि समाव जिंगानिफ्राय बारग'नायनि थाखाय इकजाम अरियरनि नैथि खोन्दो दिहुन्नायनिबो थांखि खालामदों। जेराव थानाय 2018 मायथाइआव गिबि खोन्दोआ ओंखारना फैदोंमोन। फोसावथाइ दिहुन्नायाव आन्जादनि समाव सांग्राडै एबा फिद थानाय, बुरजा नम्बर लाखिनाय बायदिनि सोमोन्दै फरायसाफोरनो थुलुंगा होनायनि सोमोन्दै बिजाबआव फोरमायनाय जादोंमोन।

पेट्रल आरो डिजेलनि बेसेना थाबैनो खम जानो हागौ

गोदान दिल्ली, 2 मार्च : रांखांथि मावख'आ पेट्रल-डिजेलनि सायाव टेक्सखौ खम खालामनायनि सोमोन्दै सावरायलायदों। जाहाथे सरासन्ना बाहायगिरिफोरनो रिहाय होनो हायो। सुलुंनि बायदिब्ला रांखांथि मावख'आ माखासे राइज्योफोर, पेट्रलियाम मावख' आरो थाव कम्पानीफोर जों सावराय लायनायखौ जागाय जेन्दों, जाहाथे टेक्सनि बेसेनखौ खम खालामनानै थावनि बेसेनखौ खम खालामनो हायो। थानाय 10 दानयाव थावनि बेसेना नै गुन बांसिन जादों, जायनि थोंजों गोहोम गोलैनायखौ पेट्रल डिजेलनि बेसेनयाव नुनो मोन्नाय जादों। थानाय 1 बोसोरार सरकारआ पेट्रल आरो डिजेलनि सायाव खनै टेक्सखौ



बांहोखांबाय। भारतआ मुलुगनि थामथि बयनिखुइबो बांसिन थाव बाहायगिरि पेट्रल आरो डिजेलनि बेसेना 60 जौखोन्दो टेक्सखौ लानाय जायो। भारतयाव 36 रां लिटाराव सौफैनायाव सौफैनाय पेट्रलनि बेसेना दिल्लीयाव 91 रां जादों। बेवहाय 55 रांनि टेक्सखौ सरजाबनाय जादों। सरकारा टेक्सखौ खम खालामनायनि सिगां थावनि बेसेनखौ

दिदोमथियाव थाजानो गोसो जादों, जाहाथे टेक्स स्ट्रक्सारखौ सोलायनाइ। थामथि सानावबो पेट्रल आरो डिजेलनि बेसेना सोलायाखै। दिल्ली मुम्बाइयाव पेट्रल आरो डिजेलनि बेसेना गोबां जादों। दिल्लीयाव 1 लिटाराव पेट्रलनि बेसेना 91.17 रां आरो डिजेलनि बेसेना 81.47 रां जादों। मुम्बाइयाव 1 लिटाराव पेट्रलनि बेसेना 97.57 रां आरो डिजेलनि बेसेना 88.60 रां जादों।

थानाय 50 बोसोरनि गेजेराव बोथोर गाज्रिनि जाहोनाव 1.4 लाख सुबुंफोरनि जिउ खहा जादों



1,41,308 सुबुंफोरनि जिउ खहा जाबाय। बिसोरनि बायदिब्ला दै बानानि 3,175 था जाथायफोराव सा 65,130 सुबुंफोर, चक्रबात बारहुंखांनि 117 था जाथायफोराव सा 40,358 सुबुंफोर, गरम बारहुंखांजों सोमोन्दो गोनां 706 था जाथायफोराव सा 17,362 सुबुंफोर आरो सारअन्थाय गावनायनि 2,157 था जाथायफोराव सा 8,862 सुबुंफोर थैदों। भारतयारि बोथोर बिगियान बिफान (आइएमडि) आ बे बोसोरावबो सा आरो सान्जा भारतआव गोबां गरम जागोनखौ हमदांदों। बे ओन्सोलफोराव बोसोरफोमबो सरासन्नायै दुंहाव बारहावाजों गोबां अन्जिमानि सुबुंफोर थैयो। ग्लबेल वार्मिनिनि जाहोनाव थानाय 20 बोसोरनिफ्रायनो बिबुडु बारायगसिनो दं। 1901 नि उननिफ्राय 2020 बोसोरा 8थि बयनिखुइ गरमसिन बोसोरमोन। रिपर्टयाव बुंनय बायदिब्ला, गिबिनि 10 बोसोरनि रुजुनायाव थानाय 20 बोसोरनि गेजेराव इडब्लिउआव बांसेयावबो थैनायनि बिबाड 27 जौखोन्दो आरो 30 जौखोन्दो दावखलायदों।

गोदान दिल्ली, 2 मार्च: बोथोरनि गाज्रि जाथाइफोर एबा बोथोर गाज्रिनि जाहोनाव थानाय 50 बोसोराव हादतआव 1.4 लाखनिखुइ बांसिन सुबुंफोरनि जिउ खहा जादों। बेयाव गोबां गरम आरो अखांनिफ्राय सारअन्थाय गोलैनाय बायदि जाथायफोर दंफादेरो। हादतनि जौसिन बोथोर बिगियानगिरिफोरनि गेजेरजों होनाय मोनसे रिपर्टआव बे खौरांखौ होनाय जायो। रिपर्टआव बुंनय बायदिब्ला, 1970-2019 नि समाव गासै 7,063 था गाज्रि बोथोरनि जाथायफोरखौ रिक्ड खालामनाय जादों। बेयाव गरम बार, गुसु बोथोर, दै-बाना,

सारअन्थाय आरो चक्रबात बारहुंखाफोरा दंफादो। बे रिपर्टआव बांसिन थागिरि थानाय राइज्योफोर जैरे, अन्ध्र प्रदेश, बिहार, उरिष्या, आसाम, महाराष्ट्र, केरेला आरो सोनाब बंगखौ गिबियाव दोन्नाहै हाबा मावनाय यजनाखौ जौगाखां होनायनि गोनांथिनि सायाव बोलो होनाय जादों। जेना गोनां बोथोरजों सोमोन्दो गोनां जाथाइफोरजों बे राइज्योफोरनो बयनिखुइ बांसिनै जिब-जुनातनि खहा जानांदों। बोथोर बिगियानगिरिफोरा गावसोरनि रिपर्टआव बुझेदि, 50 बोसोर समाव गासै 7,063 था जाथायफोरनि गेजेरजों सा

आर्जेन्टिनायाव डायनासरनि जीबारम मोनदों



बिडुनास आयर्स 2 मार्च: आर्जेन्टिनायाव हा जावखथानाय समाव डायनासरनि जिबासम मोनदों। बिगियानगिरिफोरा बेखौ टाइटेनसर मुनि डायनासर यूपनि सोद्रोमा महरै सिनायथिनो हादों। बेखौ बुहुमनि जारिमिनाव हा सा बाहागोयाव मोन्नो हानाय बयनिखुइबो देरसिन जुनातफोरनि गेजेराव मासे फोरमायदों। सं दानगिरिआ फोरमायनाय बायदिब्ला मोन्नो हानाय जीबासमआ 140 मिलियन बोसोरनि सिगांनि क्रिटेसियास समनि। बेनि मुंखौ निनजाटाइटन जापाताइ फोरमायदों। बियो निनजाटाइटनि सिनायथिखौ टाइटेनसरनि महरै होदों। बे हान्जायाव डायनायसरनि गोदोनाया गोलाव जायोमोन, जाय मिरामिसमोन। बेनि थोंत्रे आथिड खुथिया बायदि जायोमोन। आथिखालाव बे जीबासमनि खावसे बाहागोखौल'मोनदों। बिगियानगिरिनि बायदिब्ला बे डायनासरआ बुहुमनि सायाव 9.8 कौटि बोसोर सिगां थायोमोन। बे जीबासमनि 24 था सिनसिनि हाराखौ मोन्नाय जादों।

बे बोसोराव गोबां गरम जागोन

गोदान दिल्ली, 2 मार्च: आथिखालाव मुलुग दुंखावनाया बयबो सुबुंफोरखौ मोनदांथि होदों। रिपर्टनि बादिब्ला बे बोसोराव गरमा सा आरो सा-सान्जा भारतनि अनगायै हादतनि सान्जा आरो सोनाब बाहागोयाव साननि बिबुडु सरासन्नानिफ्राय बांसिन जागोन। खोला आरो बेजों नांजाबनाय भारतयाव बिबुडु सरासन्नानिफ्राय खमसिन जागोन। बे बोथोराव हादतनि बांसिन बाहागोयाव मेक्सिमाम बिबुडु सरासन्नानिफ्राय बांसिन जागोन। छत्तीसगड, उरिष्या, गुजरात, बोरिमा महाराष्ट्र, गवा आरो बोरिमा अन्ध्र प्रदेशयाव मेक्सिमाम बिबुडु बांसिन जागोन। बोसोर बिफाना बुंदों हिमालयनि गाहाय ओन्सोल,



सा-सान्जा भारत, गेजेर भारतनि सोनाब बाहागो आरो खोला भारतनि प्रायध्दीपयाव हरनि समाव मिनिमाम बिबुडुबो सरासन्नानिफ्राय बांसिन जागोन। गेजेर आरो सान्जा भुमध्य रेखा प्रशान्त लैथोमायाव आरो लैमानि सा बाहागोनि

बिबुडुआव ला-नीनाआ सोमजिखांदों। बे बोसोरनि गरम बोथोराव ला नीनानि थासारिया थाबाय थागोन। ला नीनाना प्रशान्त लैथोमानि गुसु दैजों सोमोन्दो दं। भारतनि उप महाध्दीपनि बोथोर सायाव ला नीनानि थासारिआ थोंजों गोहोम गोलैयो।

भारतनि गं 258 दालांफोर आरो गं 10 था सुरंगनि गेजेरजों खारो गंसे ट्रेनआ

गोदान दिल्ली, 2 मार्च : गुसु बोथोरा लासे लासे जोबलां गासिनो दं। बेबादिं बोथोर सोलायनायाव जुदि दावबायनो गोसो जादोब्ला भारतीय रेलजों दावबायनो हागोन। भारतीय रेलजों हायेन सेर सेर आरो हाजोनि गेजेर गेजेर दावबायनो हागोन। गिबियाव हाजो ओन्सोलाव रेल दावबायनाया गोबां खममोन। नाथाय भारतीय रेलआ मोनसेनि उनाव मोनसे जाफुसारनायखौ मोनो हादों आरो आथिखालाव गोजों गोजों हाजोयावबो भारतीय रेलआ गोखौनो खारो। बेबादिनो मोनसे जायगा तामिलनाडु आ। बेवहाय नीलगिरि माउन्टेन रेलवेआ गावनि गोखों ट्रेकनि जाहोनाव मुलुगनाडै मोनसे आलादा सिनायथिखौ मोनो हादों। बे ट्रेनआ समायना हायेननि सेर सेर दावबाय लाडो। नीलगिरि माउन्टेन रेलवेआ मेटटुपालयम आरो



उटीनि गेजेरव ट्रेन सिबिथायखौ फिन जागायजेन्दों। बे ट्रेनआ तामिलनाडुयाव कुन्तुरनिफ्राय उटीनि गेजेरव खारो। बे ट्रेनआ खोला भारतनि गंने बयखिडुबो मुंदांखा हिल स्टेसन उटी आरो कुन्तुरखौ सरजाबयो। मख 'नो गोनादि, बे ट्रेनआ खफजों खारो। बे ट्रेननि रुटखौ इउनेस्फआ हेरिटेस साइट फोसावदोंमोन। बोसोरफ्रामबो रोजा रोजा सुबुंफोरा बे रुटयाव

दावबायो। बे रुटयाव खारनाय ट्रेनयाव स्वीस एक्स क्लास खैलाजों खारग्रा इन्जिनखौ बाहायनाय जायो, जाय मुलुगनि बयनिखुडुबो गोजाम रेलवे इन्जिननि गेजेरव मोनसे। बे रुटयाव गासै गं 13 था रेलवे स्टेसन दं। जायखौ गोबां समायना जायगायाव बानायनाय जादों। बे जायगाखौ ट्रेनजों दावबायब्ला सोगोंफुरिखौ मोन्दांथियो। गोजों हाजो सारि

सारि आरो समायना हायेननि गेजेरव खारनाय बेट्रेकखौ 1908 याव बानायनाय जादोंमोन। बे फिसा ट्रेनयाव गंन्रै डाब्बा आरो 180 था मासिफोर दं। हमदांन लानाय जायोदि, बे ट्रेनआ एसियानि बयनिखुडुबो गोजोंसिन आरो गोलावमिटर गेजयाव खारो। बेट्रेन स्टाव गं 10 निप्रय बॉसिन सुरंग दं आरो 258 था दालां दं, जाय बे ट्रेननि दावबायनायखौ रंजाथाव बानायो।

मंगलियानि कजाख हारिया सिखा बाजोनि गेजेरजों मैहुर खालामो



गोदान दिल्ली, 2 मार्च : सरासन्ना महैरै मैहुरारिआ मैहुर खालामनो थाखाय हाथियारफोरखौ बाहायो। नाथाय मंगलियानि कजाख हारिआ फिसा फिसा जुनातखौ मैहुर खालामनो थाखाय सिखा बाजोखौ बाहायो। बे हारियाव 'इगल हन्टर'खौ गोबां मोजां मोनोदि बलिभिया आरो कीर्गिस्तानयाव हान्टिं फेस्टिभेल

सलबरुनखौबो खुंनय जायो, जाय बृहस्पतिवारनिफ्राय जागाय जेन्दों। मंगलियानि मैहुर खालामग्राया बुंदोंदि, कजाख हारिया सिखा बाजोजों मख 'जाथाव सोमोन्दो दं। सिखा बाजोया मुलुगनि थाखाय मासे दाव। नाथाय बेयो जॉनि थाखाय मोजां लोगो आरो फंबाय जायो। सिखा बाजोखौ ट्रेनि होनाया बयनिखुडुबो अनजाथाव



खामानि। बेखौ बांहोनो थाखाय गथ 'फोरखौ उन्दैनिफ्रायनो सिखा बाजोखौ ट्रेनि होहोनाय जायो। मानोना सिखा बाजोनि गेजेरजों मैहुर खालामनानै गावसोर जिउ खुडो। बेयो साफ्रामबो कजाखनि सम्माननि बाश्रा जायो।

अनजालि

नोखौ नेनानै मंग्लिबाय आनि जीउमाया, जेब्ला फोथार- बारिआव बेरायनो थाडो, अब्ला साया- माया सिखिरि सिखला जानानै मोसाफेनाय बायदि नुयो। दागुगालां नों रजे आनि बिखानि मैला जानानै। आरोबाव हालिया आं सहायनो, आनि गोबों इंसिनि दानानै दोनखानाय सनानि फनजारिआव हाबफेदो। नुदों आं सिमां नोखौ लानानै- नोखौ लानानै, सनानि देरा लुनो नाजादों आं सिमांखौ मोकथां खालामनो। दड हनै जिउनि लामायाव गसंथेनानै सुथुरफोरा हानजानि- हानजा मोजां मोनलायनायनि बेरेखा उदखारिफ्रा। थास' एउझानाय बायदि एउझंगोन आं नोनि थाखाय। बोहैहोगोन उदखारिफोरनि थैनि बाना, दुगैगोन आं बिसोरनि थैजों बोहैहोगोन उदखारिफोरनि मेगननिफ्राय मोदेनि बाना नोनि थाखाय। सौसि- सौसि थंगोन आं हाग्रा- बंग्रा दैमा- दैसा, हाजो- हाला, बिलो- फुखानि गेजेरजों। दैमाखौ बारनो हायाब्ला, सनानि बान्दो खोनानै होसोलांगोन आं नोनि रेखानि थाखाय, अनजालि।

रंजालि गथ' फोरनि सौरा

आनि मेगननि फैसालिआव नों

मेगननि फैसालिआव हाबना थाबाय नों ! आनि गोबों बिखायाव अरायनि थाखाय जायगा लादोंमोन रजे.....नों....., माबोरे बावनो हाबावनो आं नोखौ सना ॥ बावनो नाजाबानो दाहानि निजोरायासो..... बोहैग्लायो जेब्लाबो जिउआव..... ॥। गोबों बिखा सिंखाव-सिंखाव बोहैदोंमोन, नोनि अन्याय आनि लायमोन सोलेराव..... नोंनोथ' जासि हरगोदोंमोन मोजां मोन्यायनि इसाराखौ आंनो मुलुग संसाराव दिनै..... नाथाय, दिनै मा सानखो नों आनि अन्याय आरो मोजां मोन्याय नों अनमुला सनाआ..... ॥ थार मोजां मोन्यायखौ नंखाय खालामना.... गोथार अन्यायखौ नेवसि गारना खालाम लानोसै नामा नों आंखौ लामानि सासे अन्यायनि बिबायारि महाराव... नों जुदि आनि गोबों बिखायाव हांमा होलांबा जानानै थागोन आं..... नोंजोंनो नेवसि गारजानाय गोथे सालिनि सासे भुत जानानै थागोन आं जोनोमाव। बावनो सानबाय नामा नों आंखौ स.....ना ॥ दं खालि आनि गोबों बिखायाव नोनि ल' अन्याय दिनै....आरो थागोन अरायबो... ॥।।

थरायना राणी ब्रह्म

दासान नों आंखौ गाजि

कक्राझार नाराबारि गामिनि देसा सेराव नआ बनि, थायो आंबो बनि ननि हरेजाय। सानोमोन आं बेजों फेसे गोदे राव रायज्जालयना लानो। नुवा नुदोंमोन आं, नाथआ नायदोंमोन बेखौनो आनि सान्ना। नाथाय बहा नुबावनो बहा नायनो हाबावनो। खालाम फलांबाय आं बनि गोसोखौ दुखुनि लैथोआव गब' होना दोनफलांबाय आं। सानाखैमोन आं एसे अखा निहोर बायदि थायफ्रिनायादि बाना जागोन। बानाखौ नुना सानबाय आं नाव बानायहां साथा लाहां जाबाय गोसोआ आनि। बाना जाखाबाय जावलांनो मालाय नावखौ बहा। साथाखौ हमबालाय मा जानो ? जाबाय जाबाय गोसोआ आनि बनि दुखुआवनो उसाव बादाव। लुना होदोंमोन आं मालायनि समायना बिफांआव दैखौ। सानाखैमोन आं बेलासि समाव दै लुना होबादि रोदायाव नांन राहैहोगोन। मालायनि हासार गोनां हायाव रज'नाय समायना बिफांनि बिबायखौ आं बोरै मोनो ? दुखुआव दोनफलांबाय आं बेखौ निमाहा होगोनदा बेयो आंखौ ? सानगोनदा बियो आंखौ निमाहानि जग्य' ? हिन्दि रावआव होन्दों, मैने किसिका दिल दुखाया है, मुझे माफ करो, आनजानेमे गलती होगी।

आनसाइ गयारी
जिल्ला: कक्राझार।

सैया-सैया खालामो अनजालुआ आंखौ

नै अनजालु नों आंखौ गोजाननिफ्राय नुब्लानो, मानो एरा-एरा खालाम लाडो ? मानिबा गोरोन्थि बुंफलांदों नामा आंलाय ? ना माबाफोर दाय मावफलांदों नामा ? दिनै नों आंखौ गारनानै, गुबुनखौ लानो सान्दों नामा ? बिदिब्ला नों मानो आगोलाव आंखौ मोजां मोनामोन ? दाना मानो सैया-सैया खालामखो ? सानदोंमोन नामा नों आंखौ सान्दोंमोन, थाखायल' मोजां मोनफलांनो, आंखौ फागिलसो खालामनो सान्दोंमोन नामा नोंलाय अनजालु ? आं नोखौ थैनानै थांलाबो नोनि, महरखौ बावनो हानाय नडा। आनि थायनै मेगनाव नोनि, महरा जेब्लाबो साया-माया गेले फेबाय थागोन अनजालु। दाखालामसे नों आंखौ सैया-सैया।

मुसिमा सबानि नार्जारी
कक्राझार।

गियाननि फुंखा

स्नेहोच:-

1. अस्ट्रेलियाआव रांखौ मा बुडो ?
2. ब्राजिलयाव रांखौ मा बुडो ?
3. नेदारलेण्डयाव रांखौ मा बुडो ?
4. डेनमार्कयाव रांखौ मा बुडो ?
5. फ्रान्सयाव रांखौ मा होनो ?
6. जार्मानियाव रांखौ मा बुडो ?
7. P.O नि फुल फर्मया मा ?
8. P.T.O. नि आबुं मुज मा ?
9. P.W.D. नि आबुं मुज मा ?
10. S.P. नि आबुं मुज मा ?
11. M.B.B.S.नि फुल फर्मया मा ?

फिनाय:-

1. सिलिं। 2. कुजेर। 3. कप। 4. क्रन। 5. फ्रांक। 6. मार्क
7. Post office. 8. Please Turn over. 9. public works Department. 10. superintendent of police. 11. Doctor fo Medicine Doctor of Sunary

मुसि फुंखा नार्जारी

रुमिखौ हास्थायो आं

सोर नुदों सोर खोनादों आनि दुखु दाहाखौ, दावसि दावसायासो साखि दं, नोखौ सान्नानै हारिं हाला बिबार बारि-बारि बेरायला बायनायखौ नुनानै जरा- जरा बिदै सोबनो फेनाय सिखिरि सुबुंफोरा आंखौ मिनिंलांबाय। नोखौ आं गोसो गोथारजों मोजां मोनो नाथाय नोनिफ्राय अन्याय मोनो लुबैयो आं, मानोनों गोसो हगार सारना होआ नों, नोनि बेबायदि गोदे रावजों रायज्जालयनाय फोरखौ लानानै जायो आं उसाव- बादाव, सोगोनि अलंबार बायदि बेफोरखौ बावगार लांनंगौबा, आनि गोसोआ हिमालय हाजो बायनाय बायदि बायनानै खाम्फा लुहैनो हायैबायदि आनि मेगननिफ्राय निजोरा बोहैगोन अनजालि। रुमिनो गुबुननि थाखाय हांगार फिथर ब्लाबो आनि थाखाय स'ना फिथर। गावखौ बिबार बारि-बारि बेरायनायखौ नुनायखाय, आनि गोसोआ गनायगोन सान्ना आंबो बिबार बारियाव बेरायलां बायो, नाथाय गावखौ नुवाबा गोसोआ गनाया, मोना बिलि समाव थाडो आं नोनि लांगोनायाव आंखौ नेना थागोन सान्ना। नोनि मिनिनायखौ नुयोबोला गोसोआ आनि अखा मोफ्लामनाय बायदि मोनो। रुमिखौ हास्थायो आं अरायबो, लायजाम हरदोंमोन आं फिनाय मोनफिनासै, नाथाय.....बिबा सोरखौ हास्थायदों ?

गपाल रामचियारी

बीं रुजेखौ

गोमोथाव नोनि महरा रजे-- जेबोला नोखौ नुयो जेराव-मेराव जेबोला नों थाबाय लाडो दाव दिंखुर बायदि जेबोला नोनि राव खोनायो दाव मैनानि गारां अबोला आंखौनो आं बावगोमा फलाडो। आंखौनो आं बावगोमा फलाडो ! मोन्याय मोनब्ला नोनि अन्याय, आजावनाय मोनब्ला आनि अन्याय। हाबाव मादि माया गोनां नोनि महरा ? बे नोनि समायना सोलेर महरानो आनि बोदोर गोसो सोलेराव सिखिरि जानानै बिरफाबाय थायोनों रजे-- आनि जिउ सोलेरनि सेर-सेर। आनि बोदोर जावलिआ गोसोआ नोखौल' मोनो हास्थायसै रजे मा राहाजों मोनगोन इसिबां गोमोथाव महर गोनां नों रजेखौ ॥

मुसि सोर खुंगुरबर'
ला:सो: चन्द्रपारा, कक्राझार।

सोर नों ?

सोर नों हायनारि बिखाया बेसेबा फिसा गोबानो सानो संसाराखौ; जिउआ आनि उन्दै बिलिरनो सानो मुलुगखौ। गोसोआ आनि, आनदायबाय आं बे संसाराव; आंहा गोसोआव बबेनिबा रादाव फेदों रंगिना गाबजों बाजल' बायदों फिथिखा लुफावनाय सेंग्रा समाव। जोबनो गैयै गोसोनि हास्थाइनाय जिउनि आंग्रिनायाव, जोबनो रोडे गाबजों मा मैया दिन्थियो नों ? अननाय गिरि। बेनो आनि गोसो।

मुसि समबारु दैमारी

मुसि गेरमसा बरगयारी

भारतनि बिसायख ʼथि आयगआ बेंगुरा, बैसो गौरा सुबुं आरो कभिड-19जों सन्देरजानाय भटारफोरनि थाखाय

खाथियाव आर'जलाइखौं जमा होनो हागोन। प्र–पत्र 12 (घ) जौं लोगोसे आर'जलाइ गथायनाया नुजाथिनो हायै भटारनि फारिलाइयाव गोरलैयोब्ला बेनि फोरमान बिलाइखौं बिथोन बायदियै होनांगोन।

बिदिन्थि बादियै जुदि भटारआ बेंगुरा जायोब्ला गावनि आर'जलाइजौं लोगोसे देहायारि मोजां नङे सुबुं मोन्थाय आयेन–2016 नि सिडव सरकार गथायनाय बेंगुरफोरनि फोरमानलाइखौं होफानांगोन। कभिड–19 सन्देह’ गोनां एबा सन्देरजानाय भटारआ पर्टेल बेलटनि थाखाय आर'जलाइ थिसन्नाय समाव फाहामसालिनि फोरमान बिलाइखौं जमा होफानांगोन। बेनि सोमोन्देयाव रिटार्नि अफिसारआ गोजोनोब्ला बिथां भटारखौं पर्टेल बेलटनि खाबु होनाय जागोन।

पर्टेल बेलटनि थाखाय होनाय आर'जलाइ थिसन्नाया बिसायख'थिनि सान फोसावनाय साननिफ़्रायनो गासै सान 5 सिम रिटार्नि अफिसारनि खाथियाव जमा हैनो हागोन। बे गोसारनाय थासारियाव रइज्योनि गासै जिल्ला बिसायख'थि बिबानगिरिया बेफोर थाखोयाव गोदानै थिसन्नाय भटारफोरनि थाखाय मोनसे आलादा राहा लानाय फारिया जागायजेनबाय।

पर्टेल बेलटनि खाबु लानो हास्थायनाय भटारफोरनि न’-न’ थानानै बुट लेभेलनि बिबानगिरिफोरनि गेजेरजों प्र–पत्र 12 (घ) रन्नाय आरो मोनफ़्रोमखौंबो सिमान लानाय। न'थाव बिसोर भटारफोरनि गेजेरव बि एल अ’ आ बिसोरनि फोनांजाब खालामनाय आबुं बाश्राखौं मिथिहोनानै फोसावनाय सान 5 नि गेजेरवनो बिसोरनि न’सिम आरोबाव थानानै सुफुंनाय आर'जलाइखौं आजावनांगोन।

पर्टेल बेलटनि खाबुखौं लानो हास्थायनाय भटारफोरनिफ़्राय बि एल अ'फोर बिसायख'थिनि फोसावनानै होनाय सान 5 नि गेजेरव आर'जलाइखौं आजावगोन आरो रिटार्नि अफिसारनो जमा होगोन। रिटार्नि अफिसारआ आर'जलाइ थिसनग्राफोरनि आबुं आर'जलाइखौं नायफामनानै फारिलाइ बायदियै आन्जाद खालामफिनगोन। जायफोर आर'जलाइ थिसनग्रानि आबुं फोरमानआ गेबें जायोब्ला बिसोरखौं पर्टेल बेलटनि खाबु होनाय जागोन। पर्टेल बेलट मोन्नाय भटारफोर जाहाथे भट मिरुयाव भट होनायनि खाबु मोनाब्ला बेनि सायाव रिटार्नि अफिसारआ रोखा खालामना होगोन।

प–पत्र 12 (घ) नि गेजेरजों जमा होनाय बेंगुरा आरो 80 बोसोर बैसोनि गोजौयाव थानाय भटारफोरनि आर'जलाइनि गेजेरनिफ़्राय रिटार्नि अफिसार गनायथिनाय मुंफोरनि फारिलाइखौं गनायथि मोन्नाय राजखान्थि दोलोनि बादायनाय बिजाथिफोरनि गेजेराव रन्नानै होगोन। बे थाखोनि भटारफोरनि न’-न’ थानानै आर'जलाइ रन्नाय आरो लांदां जायगाखौं सुफुंनाय आर'जलाइखौं थिखानाय सम बादियै बिजाथिफोरनो मिथिहोगोन। बे रहाखौं उदां आरो गेबेडै मावफुंनायनि थाखाय पुलिसनि रैखाथि आरो भिडिअ ग्रापिनि राहा खालामना होगोन।

कभिड–19 सन्देह’ गोनां एबा सन्देरजानाय भटारफोरनि न’निफ़्राय आर'जलाइ लाइनायनि थाखाय थानाय बिबानगिरिफोरनो पि पि इ किट होनाय जागोन। पर्टेल बेलटफोरखौं आजावनो हानायनि थाखाय बिसायख'थि बिबानगिरिफोर नायगिदिंनानै बे रोखोमै थांखि लानाय जागोन जाहाथे बेफोर बियाबआव भट होनायखौं खुंनायनि थाखाय थिखानाय अक्टनि सानसेनि सिगाडवनो बे बेलटफोरखौं आबुडे दैथायनाय जागोन।❑

पुलिस खुंथाया बि टि सि सेक्रेटारियेटनिफ़्राय मोन 16 बेलै–बेजे गोनां फाइल बोखांदों

मावफारियाआ पुलिस थानायाव गसर थिसन्नाय बायदियै दिनै बि टि सि सेक्रेटारियेटनिफ़्राय मोन 16 फाइलफोरखौं बोखाडो होन्नानै मिबथिनाय जादों।

मख'नो गोनांदि, बै समनि खुंथाया रइजो–राजा सुबुंफोरनि फान्डखौं बेलै–बेजे खालामनानै बाहायनाय, गेनाखांन्थि खालामनाय आरो मुबा–बेसादफोर जगायना होनायनि मुडव नंखाय बिल बानायनानै रं लुथिनायफोरखौं नोजोर होनानै इड पि पि एलनि मावफारियाआ गोखों नोजोरजों गसर थिसन्दोंमोन। बिथां बर'आ राइजो–राजा सुबुंफोरनि रंखावरिखौं बेलै–बेजे गेनायै बाहायनायनि हेंथायै गसर थिसन्नानै गोखों रहाजों नायबिजिरनो दाबि खालामनाय बादियैनो बे सिग्रोमनाय हाबाखौं लायो होन्नानै मिबथिनाय जादों। जुदि गोनांथारै संदानोब्ला गुबुन बिफानफोरवबो गोबां रोखोमनि बिबानगिरि, मुलाम्फा जाग्रा सुबुंफोरखौंबो गेनाखान्थियाव लोब्बा थानायनि फोरमानखौं मोन्नो हागोन होन्नानै बर'आ मिजिं थिनाय फोरमायो। बे गेनाखान्थिनि हेंथायै गुवाहाटी गोजौं बिजिरसालियाव मोनसे 075/2020 नि पि आइ एल थिसन्नानै सि बि आइ संदानो थाखायबो दाबि खालामदों। उत्सम कुमार बर'आ इड पि पि एल दोलोनि आइड सेलनि सासे मावफारिया। बिन गसर थिसन्नाय बायदिनो दिनै पुलिस खुंथाया बेलै–बेजे गोनां मोन 16 फाइलफोरखौं संदानानै बोखांनो हायो। बेनि सोमोन्दै कक्राझार पुलिस थानायाव केस नं 143/2021, इ3/एस 406/420/408/409/468 आइपिसिनि गेजेरजों केस जाबसिन्नाय जायो। गुबुन फारसेथिं दिनै बोखांनो हानाय बेलै–बेजे गोनां फाइलनि सोमोन्देयाव सासे सिनियर पुलिस बिबानगिरिआ फोरमायनाय बायदिब्ला बे केसनि सायाव दासान्दि गोखों संदानाय सोलिगासिनो दं।❑

इड पि पि एल दोलोआ सुबुंफोरनि जौगानाय सार्थआव बिसायख'थिनि उनाव खामानि मावनायनि बिथांखि

ओन्सोलनि मन्दिर जौगाखां होनायनि राहा लागोन होन्नानै फोसावो। हेकाइपारा गामिनि गावबुरा बिपिन रायनि आफाद दैदेन्नायाव जानाय मन्सनि गेवलां मेलयाव बाहागो लायो गागि समाज सिबियारि पबित्र कुमार राय, आजिरा मोन्नाय गाहाय फोरोंगिरि दिजेन राय, समाज सिबियारि बेनुबाला रायजों लोगोसे आक्रासु, बेंगली लाइमोन फरायसा फेडारेसननि दैदेनगिरि आरो ओन्सोलनि गोबां गागि सुबुंफोरबो बाहागो लादोंमोन। बे मन्सखौं बेखेवनानै होनाय लोगो लोंगो उन्दै–उन्दै गथ'सा, लाइमोनफोर जुथायै मोसानाय दिन्थिफुंनायनि अनगायैबो जायगायनि देंखोंगिरि अतुल बर्मन, दिजेल कच, मानब रायनि अनगायैबो हांख्नायजानाय देंखोंगिरि गिताली काकतिआ देंखो रोजाबनानै मन्सखौं मेहेरगोनांसिन खालामो। सानथामनि हाबाफारिजों खुंनाय पुजा मेला फोर्बोंआव फिरफिला बिरहोनाय, गोसोखां खाम्फायाव बिबार बाउनाय, दंफां गाइनाय नाम किर्टन गाइनाय बायदि हाबाफारिखौं फारियै खुंफुडे।❑

मिस आरो मिस्टार बि टि आर फेसन दिन्थिफुंनाया गाहामै
सुबुंसि दैमारि आरो होवाफोरनि बादायलायनायाव गिबि बान्थाखौं देरहानो हायो कक्राझार फालांगि फरायसालिमानि फरायसा ऋतिक बान्तिआ, नैथियाव पस्पेन्द्र पान्दे आरो थामथियाव कक्राझार सरकारि फरायसालिमानि गुसांक' बसुमतारिआ देरहानो हायो। मिस्टार आरो मिस बि टि आर इन्टार कलेज फेसन र्व' समायना बादायलायनायखौं खुंनाय जादोंमोन कक्राझार बिगियान फरायसालिमानि मास कमिनिवेशन बिफाननि लोगो बिबुंगोर मिस्ता देबआ। कक्राझार बिगियान फरायसालिमानि रुपाति माइथाय फालिथायखौं लोब्बा लाखिनानै बे समायना बादायलायनायखौं गाहामै खुंफुंनायाव हेफाजाब होयो बिगियान फरायसालिमा फरायसा खौसेथि आफादआ।❑

गागि सिफुं दामग्रा प्रभाद शर्मानि रुंसारि जानायखौं गिबि मन्थिआ दुखु फोरमायदों

मोन्नाय फोरमायदों। दिनै गांसे दुखुनि रादाब बिलाइनि गेजेरजों गिबि मन्थि सनवालआ बुडोदि, थाना थानाय जिउयाव रुंसारि प्रभाद शर्माआ आसामनि सुबुं मैथाइनि रोजाबनाय फोथाराव जेरैबायदि बिहोमा होलांदों बेखौं दुलाराय आसामनि सुबुंफोरानो गोसोखांगोन। सिफुं दामनायनि गेजेरजों गावनि मिलौदो रिसारखौं बोनो हानानै रइज्यो नाडैनो मिथिसार जानाय रुंसारि शर्माआ गावनि नाजानायजों गुबुन गुबुन बिथिडवबो बिहोमा होलांदों। माखासे असमीया सावथुन आरो दामजु आयदायाव आखाय होनानै रुंसारि शर्माआ संगीत नाथक अकाडैमि बान्थाखौं आजावनो हानायजों लोगोसे आसाम सरकारनि सिल्पी पेन्सन आरो सिल्पी दिबसनि बान्थाखौंबो आजावनो हादोंमोन। बेबायदि गागि सुबुडा रुंसारि जानायाव जॉनि आरो हारिमु फोथारनि थाखाय सुफुं'ख' हायै ख'हा होन्नानै गिबि मन्थिआ बुंथियो। गिबि मन्थिआ रुंसारि शर्मानि बिदाय गोजोन जिउमानि थाखाय इसोरनि खाथियाव आर'ज खालामनायनि अनगायैबो दुखुथिया नख'रनिसिम दुखु मोन्नायखौं जासि हरो। गुबुन फारसेथिं गिबि मन्थ्रनि बिथोन बायदियै गिबि मन्थ्रनि मिडिया बोसोनगिरि रिक्केसे गस्वामिआ दिनै रुंसारि प्रभाद शर्मानि न'सिम थानानै बिथानि गोथै सह'आव बिबार बाउनायजों दुखु फोरमायो।❑

हाग्रानि मैदेरजों सासे गाथारजादों

होनानै मिबथिनो मोन्नाय जादों। मैदेरजों गाथारलांजानाय सुबुंखौं 9 नं महेन्द्रपुर गामिनि अभिराम बसुमतारि (63) होन्नानै सिनारयथिनाय जादों। जायगानि सुबुंफोरनि बादियैब्ला अभिराम बसुमतारिआ गोथौं आरो गुदु हाग्राबारियाव बन लायनो मैया समबार बेसालि समाव ओंखारलांदोंमोन। बन लायनो थानाय सुबुडन न'याव फैंफिनैलाय अखा नायै फुडव हाग्राबारियाव नागिरहैयोब्ला अभिराम बसुमतारिनि गोथै देहाखौं हाग्राबारिनिफ़्राय बोखानानै न'सिम लानानै फायो होन्नानै गामिनि सुबुंफोरा फोरमायो।❑

बारग ’ एम एल एनि रुंसारि जानायखौं गिबि मन्थिआ दुखु

रादाब बिबुंसारनि गेजेरजों गिबि मन्थि सनवालआ बुडोदि, थाना थनाय समाव बिथां रुंसारि गगैआ जॉनि समाजआव जेरैबायदि खामानि मावनानै गालांदों बेयो अरायसम गोसोखांजागोन। रुंसारि गगैआ सासे एम एल ए' हिसाबै खामानि मावबोनानै रइज्योनि गेजेरव रंखान्थि जौगानायनि फारसे गोनांथार बिहोमा होदों। बिथाड साबुवा बियाबनि गुबुन गुबुन आफाद फसंथानजों लोब्बा थानानै जौगाखांनि फारसे खामानि मावलांदों। गिबि मन्थ्रिआ बिथानि गोजोन जिउमानि थाखाय आर'ज खालामनायनि अनगायैबो दुखुथिया नख'रनिसिम गावनि दुखु मोन्नायखौं फोरमायदों।❑

आसाम बिधान सभा बिसायख'थि 2021

नमिनेसन लाइफोरखौं आन्जाद खालामनाय आरो 12 मार्चआव नमिनेसन लाइ बोखानानै लाफिन्नायनि जोबथा सान महरैथि खालामनानै होनाय जादों। गिबि खोलोबनि बिसायख'थि खुंनायाव मोन 47 बियाबफोरव फैगौ 27 मार्च अक्टखालि भट आजावनाय जागोन।❑

भेरगावआव दोंथाम लामा लुनायनि

दोंथामखौं इउपिपिएलनि नेहाथारि कमल चौधुरि, भेरगाव जिल्ला इउपिपिएलनि आफादगिरि नन्दराम बर', लेडइ आफादगिरि मनमहन बर', नेहाथारि खबराम बर', आइजो हान्जानि आफदगिरिजो लभिता कसारि, नेहाथारिजो मास्वरि मसाहारि, लाइमोन इउपिपिएलनि लेडइ आफादगिरि जुहैला बर', बिजैपनि एसटि हान्जानि दैदेनगिरि फतिक कसारि, आरएसएस दैदेनगिरि रातुल बर'मोनजों लोगोसे पिडब्लिउडि बिफाननि इन्जिनियार, मावफारियाफोरा बाहागो लानानै गोथार नेमखान्थिजों बे लामा लुनायनि हाबाखौं जागायो।❑

कक्राझारआव हम गार्डफोरा दाबि सुफुंनो 3 घन्टा धर्ना होदों

खालामनाय आरो दान–बान्था बारयनांगौनि दाबिजों स्ल'गान होयो। फोरोंथाय मोन्नाय हुम गार्ड गौथुमनि कक्राझार जिल्ला इउनिर्टनि बान्जायनायाव खुंनाय बे धर्नांआ एस पि मावख'नि नांजाबनाय दैमालु गेलेग्रा फोथाराव गासै 3 घन्टासिम सोलिनायाव हुम गार्डफोरा गावसोरनि दाबिफोरखौं मावफुं'नो आसाम सरकारनिसिम दाबि देखाडो। गौथुमआ गावसोरनि गोलाव समनि खालामनाय दाबिखौं जेबो गोनांथार राहा लायैनि थाखाय आसाम सरकारखौं दाय होयो। गौथुमनि सोद्रोमाफोर फैगौ बावैसो साननि गेजेरवनो गावसोरनि दाबिखौं मावफुंनायनि फारसे गोनांथार राहा लानो दाबि देखांबावो।❑

बर’–कसारि वेलफेयार अटनमास काउन्सिलनि गाहाय मावखुलिखौं

सानजारि नोगोर सिमेन चापरियाव गायसन्नानै बेखेवनाय जायो। बे गाहाय मावखुलिजों लोगोसे खुंथाय हाबाफारि सामलायनायाव गोरलै खाबु फैनाय बादियै गुवाहाटीयावबो बेनि दालाय मावखुलि गायसन्नाय जागोन होन्नानै बिकेडब्लिउएंसिनि गाहाय खुंगिरि मिहिनिस्वर बसुमतारिआ फोरमायो।

मख'नो गोनांदि, थानाय 2020 माइथायनि 27 जानुवारी अक्टयाव दुलाराय बर' फरायसा आफाद, एनडिएफबिनि मोनब्रै हान्जा आरो इउबिपिअ'नि मिरु सरकारजों रादाय खानाय बादियै बिटिआरजों लोगोसे बर’–कसारि वेलफेयार अटनमास काउन्सिलखौंबो दाफुंनायनि राहा लानाय जादोंमोन। रादायनि दफाबादियै मोनसेनि उनाव मोनसे दफा मावफुंबोनानै थानाय फेब्रुवारी दाननि 24 खालारखालि बिकेडब्लिउएंसिनि इन्टारिम मावफुं आफादखौं सायख'नानै दानाय जादोंमोन।❑

जारागुरिआव इंराजी फरायसालिनि रुपाथि माइथाय फोर्बों फालिदों

बे इंराजी बिजॉनि फरायसालिखौं फसनाय जादोंमोन। गोबां जेना–जेंसिनि गेजेरजोंबो 25 बोसोर बारलानानै बे गोथौं ओन्सोलनि फरायसाफोरखौं इंराजी बिजोडव सोलोंथाय होनायनि राहा लादों। फरायसालिखौं 25 बोसोराव अगान होनायनि लोब्बायै सान्नेनि हाबाफारिजों दिनै रुपाथि माइथाय फोर्बों फालिनाय जायो। बे फोर्बोंनि लोब्बायै हाबाफारि बायदियै गिबि सानखालि फरायसाफोरनि गेजेरव सावगारि आखिनाय, देंखो रोजाबनाय, सोंगाब बादायलायनाय बायदि हाबाफारिया फारियै खुंजायो। बादायलायनायाव फरायसालिनि गोर्बां फरायसुला–फरायसुलिफोरबो बाहागो लादोंमोन। दिनै नैथि साननि हाबाफारि बादियै फुंनि 9.00 रिगायाव रुपाथि फोर्बोंनि फिरफिला बिरहोनायजों गोजोनै जागायो गुबै आयदानि हाबाफारिया। बेनि उनाव फरायसालिनि गाहाय फोरोंगिरि प्रबिन इस्वारनि मासि सामलायनायाव गेवलां मेलखौं खुडो। गेवलां मेलयाव गाहाय आलासि महरै बाहागो लानानै मावफुं सोद्रोमा रन्जत बसुमतारिआ गावनि बिबुंथियाव बुडोदि, सोलोंथाय फोसावदिंनानयनि बिथिडव बे इंराजी फरायसालिया जरखा बिफाव लाबोर्दों। बे फरायसालिनिफ़्राय गोबां फरायसाफोर गोजौं सोलोंथाय लानानै दिनै हादतनि गुबुन गुबुन बिबानाव थानानै सिबिंथाय होगासिनो दं। फैंबाय थानाय सानफोरवबो बे फरायसालिया आरोबाव बांसिन सुबुं सम्पद सोरंजनायनि फारसे खामानि मावलांगोन होन्नानै मिजिंथि लाखिबो मावफुं सोद्रोमाया। फ़रायसालिनि गाहाय फोरोंगिरि इस्वारिआ बुडोदि, फ़रायसालिखौं गोलाव सम जाफुंसार महरै लाबोनायाव जायगानि गोबां सोलोंथायगिरि, दिथागिरि आरो समाज सिबियारिफोरनि थोजासे बिहोमा दं। दिनैनि गेवलां मेलयाव बड'लेन्ड मुलुग सोलोंसालिनि रैजिस्ट्रर ड॰ मन्जिल बसुमतारि, कक्राझार सि आइ टिनि लोगो बिबुंगोर ड॰ बिहुं ब्रह्म, बसु' एम सि एल ए' जिरन बसुमतारि, लाइमोन इड पि पि एलनि आफादगिरि समनात नार्जारि आरो गोबां फरायसानि दिथागिरि, फोरोंगिरिफोरबो बाहागो लादोंमोन।❑

कंग्रेस दैदेन्नाय महाजतआ बिटिआरआव मोनबो रोखोमनि गोहोम खोख्लैनो हाया: प्रमद बर’

उन जानानै थायाखै। बे दोलोया मोनफ़्रोमबो बियाबआवनो बिसायख'थिखौं लानानै सांग्रंथियारि जादों आरो फैगौ बिसायख'थिया जाहाथे दोलोनि थाखाय गोब्राब जानानै फैंया बेनि थाखाय हाबाफारियाव नांथाबागसिनो दड होन्नानै फोरमायो दोलोनि आफादगिरि एबा बिटिआर सिफ प्रमद बर’आ। इउपिपिएल दोलोया बिटिआरनि मोनफ़्रोमबो बियाबावनो बिजाथि फसनानै बादायनो सानोब्लाबो लोगोयारिनि धोरोमखौं मानिनानै सोलिनांगोन होन्नानै बुडो। सिगांनि एमएलएफोर बिधान सभायाव मोनबो रोखोमनि बिथांखिनि बाश्रा बुडैनि थाखियानो बिटिआर ओन्सोला उन गोय्लैसोनानै थालांदों होन्नानै अजद खालामो बर'आ। कंग्रेस दैदेन्नाय महाजतआव बिपिएफआ लोगो जादोंब्लाबो गोलाव सम कंग्रेस आरो एआइइउडिएफआ बिपिएफनि गेनाखान्थिफोरखौं सोंखारिनानै फिन आरोबाव बिसोरखौं लानानैनो महाजत दाफुंदों होन्नानै बर'आ अजद होयो। थानाय 50 बोसोर नाडे'गेनाखान्थियाव लोब्बा थाबोनायखौं राइजो–राजाफोरा नोजोर होनानै फैदों। बेबायदि दोलोनि महाजतआ बिटिआरआव मोनबो रोखोमनि गोहोम खोख्लैनो हाया आरो राइजो–राजा भटारफोरा बिजैपि आरो इउपिपिएल दोलोखौंनो बोजबनानै लागोन होन्नानै बिटिआर सिफ प्रमद बर'आ बुडो। बिथाड बुंबावोदि, मासि रानलायनायनि सोमोन्दै सावरायनाया सोलिगासिनो दं।❑

दुलाराय ब्रह्म धोरोम आफादनि 46 थि बोसोरारि जथुम्माया जागायबाय, बोसोरारि गोसोखांथि बिजाब 'जोमा'खौं बेखेवबाय

गोनां जोबनो रोडै'यज्ञनि अर फोजॉनायजों ब्रह्म धोरोम फोसावदिं आफादनि गाहाय फोसावगिरि बाबा मनरन्जन ब्रह्मआ जागायो। पुरहित एबा फोसावगिरि बाबा बिस्ति नार्जारिआ अखन्ड यज्ञखौं सामलायो। बेनि उनाव फुंबिलि 6.30 बाजियाव दुलाराय ब्रह्म धोरोम फोसावदिं आफादनि आफादगिरि अमरेन्द्र ब्रह्मआ धोरोमनि फिरफिला बिरहोयो आरो गुरुदेब कालिचरण ब्रह्मनि सावगारियाव आलारि बाथि फोजोडो आरो मान बाउयो गुरुदेब कालिचरण ब्रह्म ट्रास्टनि देरसिन ट्रास्टि जयन्त कासारेआ। फुंबिलि 9 बाजियाव दुलाराय ब्रह्म धोरोम आफादनि 46 थि बोसोरारि जथुम्मानि गोसोखांथि बिजाब 'जोमा'खौं बेखेवनानै होयो बर राइटस एकाडेमिनि गसाइगार जिल्ला आफादनि आफादगिरिजों भवानो बाग्लारिआ। बे हाबाफारिखौं सामलायो गुरुदेब कालिचरण ब्रह्म ट्रास्टनि गाहाय नेहाथारि एबा गसाइगार बिएड फरायसालिमानि गोरायुं ड॰ अजित बर'आ। बेनि उनाव गुरुदेब कालिचरण ब्रह्म ट्रास्टनि गेवलां मेल जथुमनाय जायो। बान्जाय आफादनि आफादगिरि ध्रुब कुमार ब्रह्म नार्जारिआ फोरमायनाय बादिब्ला दिनैनिफ़्राय जागायनाय बे अखन्ड यज्ञ आरो शास्त्रबिसार मेलआ जोबथा सानसिम सोलिबाय थागोन। बिथाड ब्रह्म धोरोम फोसावनायनि गेजेरजों गुरुदेब कालिचरण ब्रह्मआ बर' समाज फोसाबनायजों लोगोसे सोलोंथाय बिथिडवबो फोसाबनायाव गोबांथार बिहोमा होदों होन्नानै बुडो। गाबोननि जोबथा हाबाफारिनि गेवलां मेलआव बिटिआरनि गाहाय प्रमद बर'आ बाहागो लागोन होन्नानै बिथाड फोरमायथियो।❑

आसाम बिधान सभा बिसायख'थिनि सिगां प्रियांका गान्धिआ मोन 5 बिथांखि फोसावदों

मिथिं खुंनायखौं फारियै सोलिहोबाय थानाय नुनो मोन्दों। बेनि गेजेरवनो गुबुन गुबुन राजखान्थि दोलोनि दैदेनगिरिफोरा भटनि मुलाम्फायाव जायखि–जाया जौगाखांनि सायाव सुबुंफोरनो बाश्रा होनाय नुनो मोनबावदों। बे बिथिडव कंग्रेसनि नेहाथारि प्रियांका गान्धिआ मंगलबारखालि आसामआव सौफैनानै कंग्रेस दोलोआ मावफुंनो लानाय मोन 5 बाश्राखौं सुबुंफोरनि गेजेरव फोसावना होयो। प्रियांका गान्धिआ होनाय मोन 5 बाश्राफोर जादों– नोगोरारि दाफामनाय आयेनखौं बोखारनाय, रइज्योयाव 5 लाख सरकारि साखि होनाय, साहा स्रमिकफोरनो सानफ़्रोमबो मोन्नाय मुजुरिखौं 3६5 रंसिम बारयनाय, मोनफ़्रोमबो न'थाव 200 इउनिटस प्रि इ्लिक्ट्रिसिटी आरो नख'र दैदेनग्रा दिथागिरिनो दानफ़्रोम 2000 रं होगोन। प्रियांका गान्धिआ बुडोदि, आसामनि सुबुंफोरनो थानाय 5 बोसोरनि गेजेरव 25 लाख साखि होगोन होन्नानै बाश्रा होनाय मोनसे दोलोनिफ़्राय दासान्दि रइज्योनि गासैबो थोखोनि सुबुंफोरा मोगा–मोगि जानांदों। नाथाय कंग्रेस दोलोआ नंखाय बाश्रा बुड होन्नानै प्रियांकाया वुंथियो। कंग्रेसनि रइज्योयारि आफादगिरि रिपुन बरया दोलोनि होनाय बाश्राखौं बेखेवनानै होयो। एम पि प्रद्युत बरदलैआ बुडोदि, आसामनि सरसनस्त्रा सुबुंफोरजों सावरायनानै मोन 5 मावफुंनो लानाय बाश्राखौं रइज्योनि सुबुंफोरनो होदों। एम पि गौरब गगैआ थोंजोडै गावनि बिबुंथियाव बि जे पि दोलोखौं सावरायनानै बुडोदि, थानाय समाव 25 लाख साखि होगोन होन्नानै मावफुंनायनि सोलाय थानाय 5 बोसोराव 5 लाख रइज्योनि सुबुंफोरखौं सरकारि साखियाव थिपन्नो हानायनिफ़्राय थारैनो फे्लें जादों।❑

कक्राझार जिल्ला खुंथाया सासेबो भटार थालाडैनि

खुंगिरि मावख'आव खुंनाय मोनसे खोंरंगिरि मेलयाव जिल्ला खुंगिरि भास्कर पुकनआ बुडोदि, कक्राझार जिल्लायाव थानाय मोन 3 बिधान सभा बियाबफोर 28 गसाइगार, 29 कक्राझार सोनाब आरो 30 कक्राझार सान्जा बिधान सभा दडः बेनिनो 30 कक्राझार सान्जा बिधान सभा बियाबआव गासै 1,102 सार्थिस इलेक्टर्सफोरखौं लाफानानै गासै 1,83,994 भटारफोर दडः। बे बियाबआव गासै 289 भट सोग्रा मिरु दडः। फारसेथिं 28 गसाइगार बिधान सभा बियाबआव गासै 1,91,069 भटारफोर दडः। जेरव 279 भट मिरुयाव भट सोनाय जायो। बजों लोगोसेनो कक्राझार सोनाब बिधान सभा बियाबआव गासै 1,86,389 भटारफोर दडः। जेरव 267 भट मिरुयाव भट सोनाय जायो। फैगौ बिधान सभा बिसायख'थिखौं जिल्लायाव गोजोनै आरो उदाडै खुंफुंनो थांखिजों जिल्ला खुंथाया दासान्दि गोखों थियारि जादों होन्नानै बुंनायजों लोगोसे जिल्ला खुंगिरिया बुंबावोदि, जिल्ला खुंथाया फैगौ बिसायख'थियाव सासेबो भटारफोरखौं थालांहोयाजासे गाहामै खुंफुंनो थांखि लादों।❑

मुलुगनाडैनो करनाजों 25.38 लाखनिखुइबो गोवांसिन सुबुंफोरा जिउ गोमाबाय

कभिडजों सन्देरजानाया सानफ़्रोमबो बारयबाय थानायजों 11 कौटि 44 लाख 41 रोजानिखुइबो बांसिन जाहैबाय। नाथाय सा 25 लाख 38 रोजानिखुइबो बांसिन सुबुंफोरा कभिडजों सन्देरजानानै फाहामथाय लानाय समाव जिउ गोमायो। मुलुगनि गेजेरवनो गोहोगोरा हादत महरै मिथिसार जानाय आमेरिकायाव दासान्दि कभिडनि गोसारनायखौं दवथायनो हायैबादि जानानै दं। बे हादतआव कभिडजों सन्देरजानाय सुबुं अन्जिमाया 2 कौटि 86 लाख 63 रोजानिखुइबो बांसिन जाहैदों। जेरव 5.14 लाखनिखुइबो बांसिन सुबुंफोर जिउ गोमादों। गुबुन फारसेथिं भारतआव कभिडजों सन्देरजानाय सुबुं अन्जिमाया 1 कौटि 11 लाख 24 रोजानिखुइबो बांसिन जाहैनानै दं। नाथायबा भारतआव 1 कौटि 7 लाख 98 रोजा 921 सुबुंफोरा करनानिफ़्राय उदां जानो हायो। बेनि गेजेरव 1 लाख 57 रोजानिखुइबो बांसिन सुबुंफोर जिउ गोमादों। 1 कौटिनिखुइबो बांसिन कभिडजों सन्देरजानाय दर 3 हादतफोरनि गेजेरव ब्राजिलआ दासिम कभिडजों सालोबजानानै दं। बे हादतआव 5 लाख 87 रोजानिखुइबो बांसिन सुबुंफोरा सन्देरजानानै दासिम 2.55 लाख सुबुंफोरा जिउ गोमादों। मख'नो गोनांदि, आमेरिका, भारत आरो ब्राजिलनि उनाव कभिडजों बयनिखुइबो बांसिन गोहोम गोय्लैनाय हादतफोरनि गेजेरव रासियाआव दासिम 42 लाखनिखुइबो बांसिन सुबुंफोर सन्देरजानानै दं। बे हादतआव 85 रोजानिखुइबो बांसिन सुबुंफोर जिउ गोमादों। एैहाय ब्रिटेन हादतआवबो कभिडजों सन्देरजानाय सुबुं अन्जिमाया 41 लाखनिखुइबो बांसिन जाहैदों। फ़ान्सआवबो 38 लाखनिखुइबो बांसिन सुबुंफोर सन्देरजानानै सा 86 रोजानिखुइबो बांसिन सुबुंफोरा जिउ गोमाबाय। स्पेइनआवबो दासान्दि बारयबाय थानानै गासै 32.04 लाखनिखुइबो बांसिन सुबुंफोरा सन्देरजादों। बे हादतआव 69,609 सुबुंफोर जिउ गोमादों।❑

लुरिन ज्यतिखौं गाग्लोबग्रा दायनिगिरिखौं हमनांगौनि दाबियाव सोमावसारदों

घन्टा धर्नानि सोमावसारनाय हाबाफारिखो खुडो। असम जातीय परिषदनि कक्राझार जिल्ला आफादनि बान्जायनायाव खुंनाय बे हेंथा सोमावसारनाय हाबाफारियाव बि जे पि सरकारनि हेंथायै गोखों सोमावसारनानै सुबुंफोरा बि जे पि ग' बेक, आसाम सरकार हाइ–हाइ, सर्वानन्द सनवाल मुर्दाबाद, लुरिन ज्यति गगै जिन्दाबद, गाग्लोबग्राखौं हमनांगो बायदि स्ल'गान होनानै धर्ना होनाय जायगाखौं गोमसाहोयो। जिल्ला आफादनि नेहाथारि देबासिस दासआ गगैखौं गाग्लोबनाय जाथायनि सायाव गोखों रवजों सोंखारिनायजों लोगोसे दायनिगिरिखौं थाबेनो हमनांगो होन्नानै दाबि देखाडो। बेनि अनगायैबो बे हाबाफारियाव जातिय यु

डान्स दीवाने सिजन 3नि सासे बादायारिआ सानफ्रोमबोनि जाग्रा आदारखौ बुथुमनो थाखाय गासै 151 खिखरसालिखौ सिखोन साखोन खालामो

गासै 151 खिखरसालिखौ सिखोन साखोन खालामो गोदान दिल्ली, 2 मार्च : बिग बसआ जोबनायनि उनाव डान्स दीवाने सिजन 3 आ आथिखालआव सुबुंफोरखौ एन्टरटेन्मेन्ट खालामदों। श्व'नि माखासे प्रमफोरखौ एखेराहेयै फोसावदों। माखासे बादायारिफोरनि गोसो बोनो हाथाव सल'खौ बे श्व'आव दिन्थिनाय जादों, जेराव राहुल सलन्कीनि सल'खौबो दिन्थिनाय जादों। बेनि प्रमखौबो इन्सटाग्रामआव सेयार खालामदोंमोन। प्रमआव दिन्थिदोंदि,



मुम्बाइनि मोनसे चलआव थाप्रा गुजराती नख'रनि फिसाज्जल राहुलआ गावनि नख'रनि सुबुंफोरजों लोगोसे मुम्बाइ जफ्रा बस्तिनि दाखोरखौ जमा खालामो। बेल' नडा बियो सुबुंफोरनि आरो ओन्सोलनि 51 राइज्योआरि खिखरसालि खौबो

सुयो। राहुलनि बिफाया गटरआव ओंखारनानै सिखोन-साखोनबो खालामो जायखौ बियो एसेबो मोजां मोना। भिडियआव राहुलआ फोरमायदोंदि, गाव गावनि नख'रनि सुबुंफोरखौ मोजां न'आव लानानै थानो सिमां नुयो।

राहुलआ 28 फेब्रुवारीआव डान्स दीवाने 3' आव गावनि अडिसनखौ होदोंमोन आरो गावनि रोग'थि गोनांनि सायाव बियो सेलेक्टबो जाबाय। राहुलनि सल'खौ खोनानानै माखासे सुबुंफोरा इमशनेल जादोंमोन। फार्सेथि धर्मेश येलान्डेआ गावनि गोजाम सानफोरखौ गोसोखोंदों। बियो बुंदों, गावनि बिफाया दासिमबो साहानि गला होयो। बियो राहुलखौ बुजायनानै बुंदों, जायखि जाया हाबाफारिया फिसा आरो गिदिर जाया। मख'नो गोनांदि, 'डान्स दीवाने सिजेन 3' खौ

रबिबाराव कालार्स चनेलआव जागायदों। बे श्व'आव तुषार कालिया, धर्मेश येलान्डे, आरो माधुरी दीक्षितखौ जाजनि महरै नुनो मोन्दों। श्व'खौ राघव जुयालआ हस्ट खालामदों। बे श्व'आव माखासे ओरैबायदि महरफोरनोबो खबु होनाय जादों, जायफोरा ससियेल मिडियानि गेजोरजों भाइरेल जादों। श्व'आव गाव गावनि रोंग'थिखौ दिन्थिनो थाखाय जेबो रोखोमनि बैसोखौबो थि खालामनाय जायखै। गासिबो बैसोनि रोंग'थि गोनां सुबुंफोरा बे श्व'आव बाहागो लानो हागोन।

जन आब्राहामआ गान्दु खोबनानै गावनि गोमोथाव सावगारिखौ सेयार खालामदों



गोदान दिल्ली, 2 मार्च : बलिउडनि एक्सन हिर' जन आब्राहामआ गावनि फिट बडीखौ दिन्थिनायनि मोनसेबो खाबुखौ नागारा। जनआ सावथुन आरो ससियेल मिडियाफोराव गावनि बल्ड आखुखौ गोसो होसारनानै दिन्थिदों। बावैसो समाव जनआ आरोबाव खनसे बेबायदिनो जाहोनफोरनि थाखाय दोहौ गोलाडे खौराडाव थाबाय थादों। बियो गावनि ससियेल मिडिया एकाउन्टआव मोनसे बल्ड सावगारिखौ सेयार खालामदों। बे सावगारियाव जनखौ आबुडे ड्रेस गान्नाय नुनो मोनाखै, बियो गांसे गान्दुनि मदतजों गावखौ खोबदों। फुडाव जननि बे सावगारिफोरखौ नुनानै फेन्सफोरबो गोमोदों आरो गोबां फिनजाथाय होनायबो नुनो मोन्दों। जन आब्राहामआ गावनि इन्सटाग्राम एकाउन्टआव बे सावगारिखौ सेयार खालामदों। बे सावगारियाव नुनो मोन्दोंदि, जनआ ड्रेस गानालासे सफायाव जिरायदों। बेयो गावखौ गंसे गान्दुजों खोबदों। बे सावगारियाव जनखौ केमेरारि फार्से मिनिनानै पज होनाय नुनो मोन्दों। बिन आथिं खाथियाव मोनसे रुम हिटार दोन्नायबो नुनो मोन्दों। बे सावगारिखौ नुनानै बेनिटि बेनआव लानाय बायदि हमदोंनो हादों। बे सावगारिजों लोगोसे जनआ केप्सनआव लिरदों बर्डरबनि थाखाय नेनानै दड।

कियारा आडवाणीआ रेपार राजा कुमारीनि मिउजिक भिडियआव दोहौ सोमजि होदों

गोदान दिल्ली, 2 मार्च : फावखुंग्रि कियारा आडवाणी आरो बानी जेआ रेपार राजा कुमारीजों लोगोसे 'आइ एम ए रिबेल' टाइटुलजों मोनसे ट्रे कखौ फोसावदों, जाय आइजोआ गोखों आरो आथोन समानथिनि सायाव थुलुंगाखानाय। बे देंखोखौ ओरैबायदि समआव रिलिज खालामदों, जेब्ला 8 मार्चआव मुलुगनाडे महारियारि आइजो सान फालिनाय जागोन।



थानानै थानायनि सोमोन्दै जादों। मुलुगनाडे मा सानो, बेनि थाखाय जिंगा सिनाय गैया। गाव आइजोफोरनि उननि थाखोखौ गाव गावनि सायाव फोथायनायखौ लाबोनो थाखाय थुलुंगा होनो हास्थायो।

बे देंखोनि सोमोन्दै राजा कुमारीआ बुंदों, गाव अरायसम गावखौनो गाव मिउजिक स्वइस आरो केरियारआ मोनसे रीबेल मानिदों। गाव बेबायदि देंखोफोरखौ रोजाबनो मोजां मोनो आरो बानी जे, कियारा बायदि माखासे गोखों आइजोफोरजों लोगोसे सरजाबनानै गोबां गोजेनाय मोन्दों। देंखोनि मिउजिक भिडियखौ लस एन्जिलस आरो मुम्बाइआव सुटिं खालामदों। बेनि सोमोन्दै राजा कुमारीआ बुंवावदों, गावनि थाखाय बेयो अरायसम गावनि सर्तआव

टिभि स्व' कुबुल हैनि वेब बार्जन 2.0 खौ जी 5 नि गेजेरजों फोसावदिं खालामदों



गोदान दिल्ली, 2 मार्च : रमान्टिक टिभि स्व' 'कुबुल है'नि बार्जन 2.0 खौ जी 5 नि गेजेरजों नायगिरिफोरनि गेजेराव फोसावदिं खालामसिगोन। समबाराव बेनि ट्रेलारखौ रिलिज खालामदों, जायखौ जी 5 आ गावनि सशेल मिडिया एकाउन्टआव शेयार खालामदों। बे स्वआव करण सिं प्रवार आरो सुरभि ज्यतिखौ आसाद आरो जयानि गाहाय फावआव नुनो मोनगोन ट्रेलारखौ मोनसे रमान्टिक नटआव जागायो, जेशव आसाद आरो जयाआ आरोबाव खनसे लोगो मोनलायबावयो। सल'आ बांलांनय लोगो लोगोनो मिथिनो हायोदि आसादआ सासे आन्डार कवार एजेन्ट आरो बै सुबुड बेनो, जाय जयानि बिफाखौ बुथारदोंमोन। जेब्ला जयाआ बिजों इस्लामाबादआव थानो थाखाय उरां जाहाज गाखोनो थियारि जायो अक्ला बे नुंगुवै बाथ्राखौ बियो मिथियो। बिन गोसो आरो खर' मेलेमाव गोनो गोथो जायो। फारसेथि आसादआ आखाइ हरनानै जयाखौ गावजों लोगोसे फैनो थाखाय खावलायो आरो गुबुन फारसेथि, जयानि फंबाइआ बिखौ नेनानै दं।

गाहाम देहानि राहा

आसुगुर अरलुनाय हुदाया गोसोयारि बेमारनि जाहोनावबो जानो हागौ

मुलुग नाडैनि गासै खावसेनिखुइ बांसिन गथ'फोर आरो बैसो जायै गथ'साफोरा आसुगुर अरलुनायनि हुदा थायो। सोरबा सोरबाथ' बैसो जानायनि उनावबो सुबुंफोरा बे हुदाखौ नागारा। बेनि अनगायै नोंथाडा गोबां सुबुंफोरखौ नुबाय जानांगौदि, जेब्ला बिसोर नार्भास जायो एवा माबा मोनसे टेन्सन जायो अक्ला बिसोर आसुगुर अखुलुयो आरो बेजों सरासन्नायै जेबो ख'हा जाया। नाथाय माखासे केसाव आसुगुर अरलुनाया बबेबा गोसोयारि बेमारनि इसाराबो जानो हागौ। आमेरिकानि साइख्लजि थुदेखौ गनायोब्ला आसुगुर अरलुनाय हुदाखै मेडिकेल टार्मआव अनिकफेजिया बुंनय जायो। बे हुदाया सासे सुबुंनाव मानो आरो माबेरै जायो बेनि जेबो रोखा जाहोन गैया। नाथाय खेनसे जागायनायनि उनाव बेखौ होबथानाया गोत्राव जायो। (1) जाय सुबुंफोरनाव आसुगुर



अरलुनायनि हुदा जायो। बेयो सरासन्नायै सौरैबायदि समाव जायो, जेब्ला बेयो बबेबा टेन्सननि मेहुर जालाडे। बेनि जाहोना बेनोदि, आसुगुर अरलुनायजों जिंगा टेन्सन आरो जेंनाखौ जानगार खालामनायाव मदत मोनो। (2) बेनि अनगायैबो गोबां सुबुंफोरा नार्भास जायोब्ला, हार्सिं मोन्दाडोब्ला आरो ओंखाम उखेनायावबो आसुगुर अरलुयो। (3) उन्दै समाव गोबां गथ'फोरनाव आसुगुर अरलुनाय हुदा जायो। जाय देरब्लाबो बे हुदाखौ नागारनो हाया जायो। (4) माखासे जानो हागौ।

सुबुंफोरा गोसोयारि बेमारनि जाहोनावनो आसुगुर अरलुयो। बे बेमारफोरा जाबाय, एटेन्सन हाइपारऐक्टिविटी डिसअर्डर (एडि एइसडि), मेज डिप्रेसिभ डि सअर्डर (एमडिडि) अब्सेसिभ कम्पलसिभ डि सअर्डर (असिडि) आरो सोरबा सोमोन्दो गोनां सुबुंजों गावसानानायनि जिंगा। (5) माखासे सुबुंफोरनाव आसुगुर अरलुनाय हुदाजों जेनेटिकबो जानो हागौ। अदेबानि जाय गथ'फोरनि बिमा बिफानाव बे हुदाया जायो, बिसोरनि गथ'फोरनावबो बे हुदाया जानो हागौ।

बे फिथाइनि मुलाम्फाखौ मिथिनानै गोमोगोन, गरम बोसोरावबो जानांगौ




गरम बोथोरा जागायबाय। गरम बोथोराव सुबुंफोरा गावबा गावनि देहाखौ जर'खायै जोथोन लाखियो। बिसोर देहाखौ गुसुयै लाखिनो थाखाय माखासे मुवा-बेसादफोरखौ बाहायो। बेनिखायो जों दिने ओरैबायदि फिथायनि सोमोन्दै सावरायगोन, जाय गरमआव नोंथामोनिनि थाखाय जोबोद फोरमानगोन खामानियाव गोनां। मानोना बे फिथायखौ जानायजों देहाआ गुसु मोन्नायजों लोगोसे बेयो नोंथानो एनार्जीबो बुथुमनानै होयो। जों बेयाव तरमुजनि बाथ्रा बुंदों, जायखौ जानाया जोबोद मुलाम्फा गोनां जायो। (1) तरमुजयाव एन्डिअक्सिडेन्ट, मिनिरेल्स आरो भिटामिन बिसि आरो जिखौ थोजासे बिबाडे-मोन्नाय जायो। जाय गरमआव देहानि थाखाय जोबोद गोनां जायो। बेबायदियाव तरमुज जानायजों

जानायजों नोंथानि उदैया गोम्गोंयै थायो, जायजों दोगोननि हाबाफारिआबो गाहामे जायो आरो अक्ला खि गोरानिबो जेंना जाया। (5) गरमाव गावखौनो फिट आरो गाहामे थानो थाखाय इमिउनिटिखौ गोखोडे-खालामना लाखिनाया जोबोद गोनां। बेनिखायनो गरमाव इमिउनिटिखौ गोखोडे लाखिनो थाखाय तरमुज जानाया गाहाम। तरमुजआव भिटामिन सि थानायनि थाखाय बेखौ जानायजों देहानि इमिउनिटिआ गोखों जायो। (6) गरम बोथोराव सान्दुडाव ओंखारनाय लोगो लोगो एनार्जीनि आंखाल जो हमो। जायजों गोबां खेव सुबुंफोरा बे मारारबो गोमलैनाडे। बेबायदि समाव तरमुज जानांगौ, जाय नोंथांखौ मेंहोनाय नडा आरो नोंथाडा खामानि मावनायावबो मदत मोनगोन। (नट : बे लिरनायाव होनाय सुबरनया सरासन्ना खौरनि थाखायल'। बेनिखायनो जायखि जाया राहाखौ आजानवा लानायनि सिगां डाक्टरनि बोसोन लाप्रो)।

खर' मेलेमा आ थजिमै थायो आरो देहायाव एनार्जीबो सोमजियो। (2) तरमुजखौ नेमखाथि बायदिजे जानायजों देहानि कलेस्ट्रल लेभेलआ कन्ट्रलै थायो। जायजों नोंथाडा हार्टजों सोमोन्दो गोनां बेमारफोरनि गिनांगौ थाया। बेनिखायनो डाक्टरआबो तरमुज जानो बोसोन होयो। (3) गरमआव देहायाव दैनि आंखाल जाहोनो नाडा। मानोना देहायाव दैनि बिबाड खम जानायजों नोंथाडा बेमार जानो हागौ। बेनिखायो देहाखौ हाइड्रेटयै लाखिनो थाखाय तरमुज जानांगौ। (4) खि-गोरा खिनाय आरो गेसआ मोनसे ओरैबायदि जेंना जाबाय जायजों साफ्रोम सुबुडानो जेंनायाव गोमलैबाय। नाथाय तरमुज जायोब्ला नोंथाडा गेस आरो खि-गोरा खिनायनिफ्राय रेहाय मोन्नो हागौ। मानोना तरमुज

'क्योंकि सास भी कभी बहु थी'नि मुंदांखा फावखुंगुर अमन बार्माया टिभि फावखुंगुरनि दुखुखौ फोरमायदों



गोदान दिल्ली, 2 मार्च : फिसा पर्दानि मुंदांखा फावखुंगुर अमन बार्माआ माखासे मुंदांखा टिभि स्व'फोरजों लोगोसे बलिउड सावथुनफोरावबो बाहागो लाखांबाय। थानाय माखासे सानफोरव बियो बिग बसआव गोखा बाथ्रा बुंनानै गोबां खौराडाव थाबाय थादोंमोन। बिन बायदिब्ला बे स्वनि गेजेरजों रावनिबो केरियारआ जाया आरो माखासे दानसिमावल्'खौराडाव थाबाय थायो। आथिखालाव बियो मोनसे गोदान इन्टरभिउआव

गावनि एक्टि केरियारखौ लानाने आबुडे बाथ्रा बुंदों। बे समाव बियो माबेरै टिभि इन्स्ट्रिआव सासे फावखुंगुरनि केरियारआ स्व'जोबनायनि उनावबो 6-7 बोसोरसिमाव रांखाथि जोबलाडे बेखौनो फोरमायदों। अमन बार्माआ बेखौबो रोखा खालामदोंदि, गावनो रावनिबो सापर्टनि गोनांथि जायाखै आरो माब्लाबाबो हाबाफारि गैयै जायाखै। जुमनो होनाय इन्टरविउनि समाव बियो बुंदों 'गाव जाय हाबाफारिफोरखौ

मावबोदों, बेफोरखौ लानाने जेबो रोखोमनि उन दाहा खालामाखै मानोना गाव बे फोराव गावनि 100 जौखोन्दोखौ होदों। गाव मुम्बाइआव 23-24 बोसोरनिफ्राय थानानै थाबोगासिनो दं आरो दासिमबो गावनि थाखाय गोबां हाबाफारि दं। मख'नो गोनांदि, अमन बार्माआ 1983 आव सावथुन 'पचपन खन्भे लाल दीवार'जों गावनि एक्टि डेब्यु खालामदोंमोन। बेनि उनाव बिखौ 'क्योंकि सासभी कभी बहु थी' 'कुमकुम'इस जंगल से मुझे बचाओ' बायदि स्वफोराव नुनो मोनखांबाय। बियो अमिताभ बच्चनजों लोगोसे सावथुन 'बगवान'आवबो फाव खालामखांबाय। बेनि अनगायै आथिखालाव बियो गावनि अटिटि डेब्युनि थाखायबो थियारि जादों।

सानै भारतीयखौ बांलादेशआ हमनानै लाखिदों

आगरतला, 2 मार्च : सिखाव खावनायनि दायाव भारतनि सानै आबादारिफोरखौ बर्डारि गार्ड अफ बांलादेश (बिजिबि) नि गेजेरजों ह मजानायाव त्रिपुरानि गामियाव जेंना गोनां थासाारि सोमजिदों। बे खौरांखौ समबाराव पुलिसआ

होदों। पुलिसआ फोरमायदोंदि, खवाइ जिल्लानि करंगीसारा गामिनि सा 4 आबादारिफोरा सिमनायाव गेट नम्बर 26 निफ्राय तार खाताखौ बारनानै गावसोरनि आबादखौ हरनो थानोंमोन। बिसोर बेनि थाखाय बिजिबिनाव

गनायथिबो लादोंमोन। सा 4 आबादारिफोरनि गेजेराव सा 2 आबादारिफोरा गामियाव फेफिननानै फोरमायदोंदि, सा 2 आबादारिखौ बिजिबिआ गावनि जिम्मायाव लाबाय। बेजों सोमोन्दोयाव जेब्ला पिएसएफ आ बिजिबिनाव सोथि सोडो अक्ला बियो

फोरमायदोंदि, बिसोर सा 2 आबादारिफोरा बांलादेश सिमनायाव 300 मिटर सिडाव हाबलानानै निसा मुवा फान्दोंमोन। बांलादेशयाव हमनानै लाखिनाय आबादारिफोरनि मुज राजिव देबबर्मा आरो गुरपद देबबर्मा।

प्रिन्स फिलिपखौ फाहामथायनि थाखाय देहा फाहामसालियाव थिसन्नाय जादों

लन्डन, 2 मार्च : ब्रिटेननि शाही राजा नख'रनि फासँ सम्मान खालामग्रा सुबुंफोरा राजकुमार फिलिपनि देहाया गात्रि जानायनि खौरां मोन्नायनि उनाव जिंगा सिदों। बकिंघम पेलेसनि खौरांनि बादिब्ला, राजकु मार फिलिपखौ इनफेक्सननि फाहामथाय होनो थाखाय लन्डननि गुबुन गंसे देहा फाहामसालियाव थिसन्नाय जादों। पेलेसआ फोरमायदों महारानी एलिजाबेथ नैथनि फिसाय 99 बोसोरनि फिलिपखौ मोजां फाहामथाय होनो थाखाय आथिखालाव किंग एडवार्ड सप्तम देहा फाहामसालिनिफ्राय सेन्ट बार्थलम्यु देहा फाहामसालियाव लानानै थांनाय जादों। इनफेक्सननि फाहामथाय होनायजों लोगोसे बिन



बिखाखौ नायबिजिरनाय जागोन आरो बिखौ जोथोनै लाखिनाय जागोन। फिलिपखौ बेराम जानायनि उनाव थांनाय दानयाव किं एडवार्ड सप्तम देहा फाहामसालियाव थिसन्नाय जादोंमोन। बे बेरामा करना भाइरासजों सोमोन्दो गैया। राजा नख'रनि बिबानगिरिया बेखौ

सांग्रांथि थांखि लानाय फोरमायदोंमोन। पेलेसनिफ्राय फोसावनाय खौराखव बुंनाय जादोंमोन। प्रिन्स फिलिपनि देहायारि थासारिया गाहामै दं। बिन सायाव फाहामथाय होनाया मोजां गोहोम गोलैदों। बियो सप्ताह खनसे देहा फाहामसालियावनो

थांनानो हागौ। डियुक अफ एडिनबर्गनि मुंजों मुंदांखा प्रिन्स फिलिपआ 2017 याव गावनि समाजयारि बिबानखौ एंग्लायदोंमोन। ब्रिटेनयाव करना भाइरासनि जाहोनाव गोदान होबथानायनि उनाव प्रिन्सआ उइन्डसर केसटलायव थादोंमोन।

उइगार मुसलिमनि सायाव इनाय-अनागार बुथारग्लुंनायनि जाहोनाव चीननि शिनजियांआव सुबुं अन्जिमाया दावख्लायबाय

हंकं, 2 मार्च :- चीननि शिनजियां ओन्सोलाव जोनोमनि बिबाडा थाबैनो खमायबाय। बेयाव गोबां अन्जिमानि उइगार मुसलिमफोरखौ बुथारग्लुंनाय आरो सुबुं मोन्थायखौ दबथाइनाय केस फेबाय थयो। अदेबानि जोनोमनि बिबां आरो सुबुं अन्जिमा दावख्लायनायनि बाथ्राया चीननि सरकारि अन्जिमानिफ्रायनो ओंखारदों। ओरै हाय ब्रिटे इननि दैदेनगिरिफोरा आरो फोरोगिरिफोरा शिनजियांआव सोलिबाय थानाय इनाय-अनागारनि सोमोन्दै चीननि सायाव होबथानो दाबि देखाडे। मिथिनो मोन्नाय बायदिब्ला चीननि सायाव सिगांनिफ्रायनो शिनजियांआव उइगार मुसलिमफोरनि सायाव इनाय-अनागारजों लोगोसे



बुथारग्लुंनायनि दाय जाबसिन्नाय जादों। बिसोरनि सिनायथिखौ फोजोबनो थाखाय सिरि सिरिये खामानि मावगासिनो दड। मख'नो गोनांदि, शिनजियांआव थांय 2017-19 नि अन्जिमाया गोमोथाव। बेयाव 2017 आब जोनोम जानायनि बिबाडा 15.88 जौखोन्दोमोन,

जाय 2019 आब दावख्लायनाय 8.15 जौखोन्दो जायो आरो चीनआव माहारियारि थाखोयाव जोनोम जानाय बिबाडा 2 जौखोन्दोल' दावख्लायदों। बे बायदिनो शिनजियां ओन्सोला सुबुं अन्जिमाआबो दावख्लायबाय। बेयाव 2017-2019 आब गिबि बोसोराव 11.40

जौखोन्दोनिखुइ 6.13 जौखोन्दो खमायो आरो नैथ बोसोराव बे अन्जिमाया 3.69 सिम सौहै यो। फासँ थिं शिनजियांआव सुबुं मोन्थायखौ दबथाइनाय आरो बुथारग्लुंनाय के सखौ लानानै ब्रिटे इननि राजखाथियारि दैदेनगिरिफोरा गिदिरि फिन्जाथाइ होदों। लन्डनआव जानाय मोनसे वेबिनारआव बुंनाय बायदिब्ला चीनआ उइगार मुसलिमफोरखौ इनाय-अनागार खालामनो थाखाय केम्पफोराव दोन्दों। बिसोर रोजा रोजा उइगार मुसलिमफोरनि नख'रफोरखौ फोजोबस्रांदों। बेयावनि केम्पफोराव इनाय -अनागारनि सोमोन्दै मिडियाआव फैनाय खौराडा बयनिबो गोसोखौ सोमावग्लुडे।

मावरिया गथ'फोरनि थाखाय राफोदाय जादों पास्टर लिया



गोदान दिल्ली, 2 मार्च : ससियेल मिडियाआव मोनसे भिडियआ भाइरेल जादों, जायखौ नायनानै बयबो गाबगोन, बे भिडियआ खोला करियानि। बे भिडियआव नुनो मोन्नाय जादोंदि न'नि इन्जुराव बक्स बानायदों। बे बक्सखौ मावरिया गथ'फोरनि

थाखाय बानायनाय जादों। आइजोफोरा समाजखौ गिनानै बिफा गैथै गथ'खौ बक्सयाव गारना गालाडे। पास्टरलिया बे मोजां हाबाखौ मावफुंदों। बेनि सोमोन्दै पास्टर लिआ बुंदों, जेब्ला गावनि गथ'नि फाहामथायनि थाखाय देहा फाहामसालियाव थादोंमोन,

अब्ला बे समाव गोबां मावरिया गथ'फोरखौ नुनो मोन्नाय जादों। बेनि थाखायनो मावरिया गथ'फोरनि थाखाय हाबाफारि मावनो गोसो जादों। बेनि थाखायनो न'नि इन्जुरयाव बक्स बानायनानै मोनसे साइन बर्ड लागायनाय जादों। जेब्ला सोरबा आइजोआ बस्क्याव गथ'खौ दोनलाडेब्ला एलाम गाययो। बे समाव एटेन्डर फैनानै गथ'खौ लानानै थाडे। दासिमाव सा 1600 मावरिया गथ'फोरखौ खानाय जाबाय। ससियेल मिडियाआव बे भिडियआ गोबां भाइरेल जादों। सुबुंफोरा पास्टर लिखौ गोबां बाखनायदों। बे भिडियखौ नास डेलिया ससियेल मिडिया टुइटाराव सेयार खालामदों।

साअ पाउल, 2 मार्च : ब्राजिलनि राइज्योयारि सावसि सेक्रे टारिफोरा थांनाय समबारखालि हादतनि माखासे बाहागोफोराव लकडाउन आरो कार्फिउ फोसावदों, मानोना आरोबाव खेबसेयै देहा फाहामसालिफोरगव गाहाम जोथोन लाग्रा आफदनि बेडआ खम जानो हमदों। सुलुखव फोरमायनाय बायदिब्ला आरोबाव खेबसेयै बेयाव भाइरासआ गोसार गासिनो दड आरो गोखैयै कभिड-19 जों हादत नाडे सा 1000 निखुइ बांसिन सुबुंफोर थैनायनि उनाव देहा फाहामसालिनि थासारिया गात्रि जाफिन्गासिनो दड। बेनि सोमोन्दै ब्राजिलनि नेसनल काउन्सिल अफ हेल्थ सेक्रेटारिजआ गासे लाइजामआव बुडेदि, बै ओन्सोलफोरगव बांसिने होबथानांगौ, जेराव 85



जौखोन्दोनिखुइ बांसिन देहा फाहामसालिनि बेडफोरा बुंखांवाय। बेनि गेजेरजों काउन्सिलआ बुडेदि, महामरि जागायनायनि उननिफ्रायनो हादतआ गावसोरनि बयनिखुइ गात्रिसिनि थासारिजों भुगिनांगसिनो दड। माखासे राइज्योफोरा महामारि फैफिन्नाया बिसोरनि गावयारि आरो समजायारि हेफाजाबहोरा

नेटवार्क'खौबो जेंना खालामगासिनो दडआरो बेजों ब्राजिलनि गासै ओन्सोलफोराव नैथि खेब गोसारनायनि खैफोदआ बारायबाय। बेनि गेजेरजों काउन्सिलआ हादतफोराव लकडाउननि सुबुरुन होयो, जेराव गंसेबो आइसिड बेड गैया आरो आद्रा थानाय बाहागोफोराव 8-6 रिं गानि गेजेराव कार्फिउ होबथाफिन्नो दाबि देखाडे।

लाभ जिहाद बेस्ट मिउजिक एलबामआव नुनो मोन्नाय पालय घषआ बिबुंथि होदों

मुम्बाइ 2 मार्च : फावखुंमि पायल घषआ बावैसो समाव लाभ जिहादखौ टाइटे लनि सायाव गावनि मोनसे मोजां मिउजिक एलबामखौ लन्स खालामदों। जायनि उननिफ्रायनो बियो सावरायजानायजों मोगा-मोगि जानांदों। पायलनि बायदिब्ला, बे देंखोनि गेजेरजों गाव माबेबा धोरोमनि सायाव बिबुंथि होनायनि अनगायै



खालामो आरो गावनि सोमोन्दै मोनथिनायनि उनाव बियो आइजोखौ इनाय-अनागार खालामो। लाभ जिहादनि सोमोन्दै गाव गोबां नायबिजिरदों आरो गाव हमदाथिदोंदि, बेयो इन्टरकास्ट जुलि एबा एफेयारनि सोमोन्दै नड, नाथाय जा फ्रड जादों बेनि सोमोन्दै। आइजोफोरखौ थगायनानै जुलि जायो आरो बिसोरखौ इनाय-अनागार खालामो। गावसोर एलबामनि गेजेरजों सुबुंफोरनो बेखौनो दिन्थिनो सान्दों आरो आइजोफोरखौ सांग्रांथि होनो

सान्दों। पायल घषआ बुंबावदों, आथिखालाव मोजां खालामनो

नागिरदोंब्लाबो सुबुंफोरा गात्रि बाथ्रा बुंदोंब्ला बेनि सोमोन्दै जों मा खालामनो हानो। गाव बेखौबो रोखा खालामनो सान्दोंदि गाव मुसलिम कमिउनिटिनि हें थायै नडा। गावनिया माखासे मुसलिम लोगोफोर दड। बेवहाय गाव जेबो धोरोमनि बाथ्राखौ बुडाखै। लाभ जिहादनि के सआ बां गासिनो दड आरो आइजोफोरखौ बेनि सोमोन्दै सांग्रांथि होदों।

बे बोसोरनि जोबजासिमावबो करनाआ जोबनानै थांनाय नड, टिकाजों थैनाया खमायनो हागौ : हु

जेनेभा, 2 मार्च : गासै मुलुगखौनो गावनि बेंखनाव लाग्रा करना भाइरासआ बे बोसोरावबो जोबनानै थांनाय नडा। मुलुगयारि सावसि आफाद (हु)नि सासे गागि बिबानगिरिया थांनाय समबारखालि बुडेदि, बे बोसोरनि जोबजासिमावबो करना भाइरासआ जोबनानै थांनाय नडा। नाथाय करना भाइरासनि भेक्सिन फैनायनि उनाव महामारिजों थैनाया दावख्लायनो हागौ।

डाब्लिउएइचअनि इमार्जेन्सि प्रग्रामनि डाइरेक्टर डा. माइकेल रेयानआ बुंनाय बायदिब्ला, आथिखालाव मुलुगनि गासै नोजोरा करना भाइरासनि ट्रान्समिसनखौ बाडाइ लाखिनायनि सायाव जानांगौ। जुदि जों स्मार्टब्ला जों बोसोरनि जोबजासिमाव करना महामारिखौ फोजोबनो हागौ। अदेबानि भेक्सिनजों भाइरासनि गोसारनायखौ होबथानायाव मदत मोनगोन। बिथाड सांग्रांथि होनाय बुंनाय बायदिब्ला मोनसे



गोसारखानाय महामारियाव जेबो गेरेन्ट थाया। आथिखालाव बे

भाइरासआ गोबां कन्ट्रलाव दड।

बे खेबाव नर्वेनि नबेल गोजोन बान्थानि थाखाय आर'ज गाबनाय लिस्टआव हुआबो दंफायो

कपेनहेगन 2 मार्च : नर्वेनि नबेल कमितिआ थांनाय समबारखालि 2021 नि नबेल गोजोन बान्थानि थाखाय 1 फेब्रुवारीसिमाव गासै सा 329 केन्डिडेटसफोरखौ सायख'यो। बेयाव सा 234 सुबुंफोर आरो



95 अर्गेनाइजेसन दंफायो। बेयो दासिमनि थामथि बयनिखुइ

बांसिन अन्जिमा। बेनि सिगां थांनाय 2016 आब सा 376 बिजाथिफोर दडमोन। मख'नो गोनांदि, केन्डिडेटनि लिस्टयाव बेलारुसनि सायख' जानाय बेरेखा दोलोनि दैदेनगिरि स्वेतलाना तिखनस्काया

सुबुंन्त्रखौ हेफाजाव होरा सानै मावसुमा, रुसनि बेरेखा दोलोनि दैदेनगिरि अलेक्सी नवलनी, हवाइट हाउसनि आगुनि एडभाइजर जे कुशनार आरो आब्राहाम ट्रीटनि थाखाय सोनाब एसियाजों लोगोसे सिरियासल्यै सावरायगा अबि बर्कविल्जनि मुड दंफायो बेनि अनगायै नबेल गोजोन बान्थानि थाखाय सायख'नाय आफादफोराव

ब्रिटे इननि एक्सेटर सहराव नैथि मुलुग दावहानि बमा बेरफुदों

लन्डन, 2 मार्च : मुलुग दावहाजों सिलिंखार जानायनि सोदोबखौ 81 बोसोरनि उनावबो खोनानो मोन्दों। ब्रिटे इननि राजथाननि लन्डननि खाथियाव थानाय एक्सेटर सहराव 900 कि:ग्रा:नि बमाखौ मोन्नाय जादोंमोन। बेनि खौरांखौ पुलिसनो होब्ला नायबिजिरनायाव बेखौ नैथि

मुलुग दावहानि सिलिंखार खालामग्रा बमा होन्नानै मोनथिनो हादों। बेखौ डिफिउस खालामनानो थाखाय फुरा सहरखौ खालि खालाम नांदोंमोन। एक्सेटर सहरनि गोबां सुबुंफोर थाया ओन्सोलाव बमा मोन्नायनि खौरांखौ मोन्दोंमोन। बे बमाखौ शुकुबार एक्सेटर इडनिभासिंटिनि कम्पाउन्डयाव



नुनो मोन्नाय जादोंमोन। बेनि उनाव बमा डिस्पजल स्कवार्ड आरो पुलिसफ्रा फुरा ओन्सोलखौ खालि खालामनो बिथोन होदोंमोन। इडनिभासिंटिनि सा 1400

फरायसाफोरजों लोगोसे र्लेनार्यन रडनि ओन्सोलाव थानाय 2600 था न'फोरखौ खालि खालामनो बिथोन होदोंमोन। बे खैफोद गोनां बमाखौ रबिबार बेलासिनि 6 रिंगा 10 मिनिटयाव डिफिउज खालामनाय जादों। बे बमा बेरफु नाया ओरै बादि गोखोंमोनदि बेनि सोदोबखौ

10 कि:मि: सिम खोनानो मोन्दोंमोन। बे गिखंथाव बमा बेरफुनायनि जाहोनाव खाथि खालानि माखासे न'फोरनि इन्जुर आरो खिरखिया बायग्रबदों। आथिखालाव बे न'फोरखौ बायनो हागौ होन्नानै सन्देह खालामनाय जादों। बिडियआ बमा बेरफुनायजों बायखोन्दा शुखाखौ उरायनाय नुदों।

मुलुगयारि सावसि आफाद (करना भाइरास महामारिनिफ्राय बारग'नायनि थाखाय) रिपर्टस विदाउट बर्डस आरो हिउमेल राइडसखौ रैखा खालामग्रा पलेन्डनि सासे जास्टिसआबो दंफायो। सुलुखव फोरमायनाय बायदिब्ला, इनाइटेडनेसन वर्ल्ड फुड प्रग्राम 2020 आ नबेल गोजोन बान्थाखौ मोन्दोंमोन।

भारतनि प्रफेसनेल बक्सार बिजेन्द्र सिंआ 19 मार्च खालि गवाआव फाइट खालामनो थियारि जादों

गोदान दिल्ली, 2 मार्च: भारतनि प्रफेसनेल बक्सार बिजेन्द्र सिंआ फेगो 19 मार्चखालि गवाआव गंसे जाहाजयाव बक्सिं मेच गेलेनो थाखाय थियारि जादों। फारसेथिं फेगो समाव बे गेलेगोन जरखा मेचखौ सोरजों बादायगोन एबा फाइट खालामगोन बेनि सायाव दासिम गेवलाडे फोसावना होयाखै। 35 बोसोर बैसोनि बिजेन्द्र सिंआ बेनि सिंगां डब्लिउ बि अ अरियेन्टेल आरो डब्लिउ बि अ एसिया पेसिफिक सुपार मेडेल उडक सेम्पियनसिफखौ देरहानो हानायानो बिनि रायखांजाथावना। मख'नो गोनांदि, थांनाय 2019 माइथायनि नभेम्बर दानाव घानानि बारग' कमनवेल्ड सेम्पियन जानाय साल्स अदामुखौ डुवाइआव गेलेनाय बक्सिं बादायलायनायाव फेजेन्तो हादोंमोन भारतनि बिजेन्द्र सिंआ। बेनि जनिफ्रायनो भारतनि बक्सारआ मोनसेबो बादायलायनायाव बाहागो लायाखै। बिजेन्द्रनि प्रमटर आइ अ एस बक्सिं प्रमसनआ मोनसे सुलुडव बुनाय बायदिब्ला दासिम जेन्तो रोडे बायदि गेलेबाय थांनाय प्रफेसनेल बक्सार बिजेन्द्र सिंआ फेगो 19 मार्चखालि बक्सिं



रिंआव फेफिनगोन। थांनाय माखासे समनि उनाव बक्सिं गेलेनायखौ गंसे जाहाजयाव बादायलायनाय थियारि जादों बिजेन्द्र सिंआ होनानै बिनि प्रमटरआ मिथिहोयो। मिथिनाय बायदिब्ला मेजिस्टिक प्राइड गवानि पनाजिआव थांनाय देमारि रगुडव गंसे जाहाजनि सायाव बक्सिं मेचखौ गेलेगोन। खुंफुं आफादनि सुलुड मिथिहोनाय बायदिब्ला गुबुन गुबुन बादायलायनाय फोरनि नेमखाथिनिफ्रायबो आलादा महराव खुंनो लानाय बे खेबनि बक्सिं बादायलायनायखौ सुबुंफोरनि नोजोराव गोसो मुहिहोना थाखाय बिजेन्द्र सिंखौ सायख'नानै अक्टखौ थि खालामदों। लोगोसेनो भारत

हादतनि गेजेराव गिबि खेव गंसे नावनि सायावनो बक्सिं बादायलायनायनो खुंनो लानाय थांखिखौ खुंफुं आफादआ गोजोन्नाय आरो थुलुंगाखांनय फोरमायदों। गुबुन फारसेथिं बिजेन्द्र सिंआ बुडोदि, बे मेचखौ नोजोर होनानै आं जोबोद गोजोन्नाय मोन्दों आरो

गोलाव समनि उनाव बक्सिंनि रिंआव फेफिनो खाबु मोन्नायखौ आं जोबोद थुलुंगाखांनय मोन्दों होनानै बुडे आरो बे मेचखौ लानानै दासान्दि गावनि देहाखौ गोखों खालामनायाव ट्रेनिं खालामगासिनो होन्नानै फोरमायो।

बक्सिं इन्टारनेसनेल टुर्नामेन्ट मेडेल देरहानो खाथि नोजोराव मेरिकम आरो अमित पांगालजों लोगोसे सा 12 बक्सारफोर

गोदान दिल्ली, 2 मार्च: 6 थि खेव वर्ल्ड सेम्पियन जानाय एम सि मेरिकम आरो एसिया गेम्सयाव सनानि मेडेल देरहानाय गोहो-गोरा बक्सार अमित पांगालजों लोगोसे सा 12 भारतनि बक्सारफोर बे समाव मेडेल देरहानायनि खाथि नोजोरावनो दं। मिथिनाय बायदिब्ला अलिम्पिक गेम्सनि सिंगां दासान्दि सोलिबाय थांनाय बक्सिं इन्टारनेसनेल टुर्नामेन्टआव भारतनि बिसोर गेलेगिरिफोर मेडेल देरहानो थाखाय सिगाडव मोनसेल' मेचखौ देरहानायनि गोनांथि दंसे। दासान्दि स्पेइनि कस्टलनआव सोलिबाय थांनाय बक्सिं इन्टारनेसनेल टुर्नामेन्टआव सा 12 भारतनि बक्सिं गेलेगिरिफोर क्वार्टर फाइनलयाव सौहैनो हाबाय। अदेबानि बे टुर्नामेन्टआव भारतनि अलिम्पिक गेम्सयाव गाव-गावनि गेलेगोनखौ रोखा खालामनो हानाय सा 9 गेलेगिरिफोरनि अनगायैबो गुबुन सा 5 बक्सारफोरबो बाहागो लादों। थांनाय बोसोरनि अलिम्पिक गेम्सनि थाखाय क्वालिपाइड जानो हानायनि उनाव गिबि खेव मेरिकमआ 51 केजिनि गेलेनायाव गावनि गोखोंथिखौ दिथिफुंनयजों लोगोसे गुबुन हादतनि गेलेगिरिखौ फेजेन्तो हादों। गाबोन बुधवारखालि



मेरिकमआ मेडेलनि थाखाय गेलेनो गोनां मेचखौ इटालिनि बक्सार गियरदनानि हेंथायै मोगा-मोगि गेलेगोन। गुबुन फारसेथिं थांनाय बोसोरनि डिसेम्बराव जालांनय जार्माननि वर्ल्ड कापआव सनानि मेडेल देरहानाय अमित पांगालआबो 52 केजिनि गेलेनायाव क्वार्टर फाइनल मेच एबा मेडेलनि थाखाय गोनां मेचखौ स्पेइनि गेलेगिरि गेब्रियेलनि हेंथायै मोगा-मोगि गेलेगोन। बेजों लोगोसेनो फेगो टकिय अलिम्पिक गेम्सयाव मेडेल देरहागोननि दाबिदार जानाय बिकास कृष्णायाआबो 69 केजियाव क्वार्टर फाइनलसिम सौहैनानै बे गोनां मेचखौ इटालिनि गेलेगिरिनि हेंथायै गेलेनो थियारि जादों। लोगोसेनो एसिया सेम्पियन चिफआव रुपनि मेडेल देरहानाय आचिस कुमार आरो सुमित सांगवानआबो क्वार्टर फाइनलयाव सौहैनो हानानै मेडेल देरहानो खाथि नोजोरावनो दंसे। बेजों लोगोसेनो चतिस कुमार, सन्जिव, जास्मिन, मनिसा, सिमरन्जित कौर, लाभलिना बरगाहाय आरो पुजारिनि मोनहा क्वार्टर फाइनलयाव सौहैनो हानानै बे गोनां मेचखौ गेलेनो थाखाय थियारि जादों।

इन्स्टाग्रामआव भिरात कहलीनि फलवार्सआ 100 मिलियन जाबाय

गोदान दिल्ली, 2 मार्च: भारतनि क्रिकेट हान्जानि केप्टेन भिरात कहलीआ गुबुन मोनसे बिथिडव जाफुंसारो हाबावदों। मिथिनाय बायदिब्ला सशियेल मिडियानि इन्स्टाग्रामआव भिरात कहलिखौ अन्सायग्रा एबा फलवार्सफोरा गासै 100 मिलियन जाहैबाय। बेजों

लोगोसेनो मुलुगनि गेजेराव भिरात कहलीआनो इन्स्टाग्रामआव बांसिन सुबुंफोरजों अन्सायजानाय क्रिकेटर जानो हादों। दासान्दि गावनि गेलेनायखौ भारतनि हान्जायाव सोलिहोबाय थांनायजों लोगोसे गावनि सिनायथिखौबो मुलुगनि गेजेराव बांसिननिफ्राय बांसिन गोसारहोनो हादों।



मख'नो गोनांदि बे थांखिसिम मिथिसार जानाय गेलेगिरि जानो सौहैनो हानानै भिरात कहलीआ फलवार्स क्लबआव सौहैनो मुलुगनि गेजेराव 4 थि बांसिन

हानाय गेलेगिरिफोरनि फारिलाइयाव सिंगां जायगाखौ क्रिस्टियान रनाल्ड, नैथियाव लियनेल मेसि आरो थामथियाव ब्राजिलनि नेइमारआ जायगा लादों। बिसोर सा 3 गेदेमा गेलेगिरिया फुटबलनिफ्राय अन्सायजादों। नाथाय भिरात कहलीआ क्रिकेटनिफ्राय बांसिन सुबुंफोरजों अन्सायजानाय मुलुगनि 4 थि गेलेगिरि जानो

हानायजों क्रिकेट गेलेमुखौ आरोबाव गोगाथावना खालामनो हादों। भिरात कहलीनि उनाव इन्स्टाग्रामआव सचिन तेन्डुलकारआ नैथि जायगा लानानै दं। बिनि फलवार्सफोर 27.8 मिलियन। बेनि उनावनो महेन्द्र सिं धनि आरो रहित शर्मा आ इन्स्टाग्रामाव बांसिन अन्सायजानाय गेलेगिरि जानानै दं।

भिरात कहलीआ मोनथाम क्रिकेट मेच गेलेनायावबो साबसिन गेलेगिरि : मेक्सुयेल

मेलबर्न, 2 मार्च: अस्ट्रेलिया क्रिकेट हान्जायाव गोखों अल राउन्डर बेटसमेन महेर मिथिसार जानाय ग्लेन मेक्सुयेलखौ फेगो 14 थि सिजन आइ पि एलनि थाखाय स्केल सेलेन्जार्स बेंगालुरु हान्जाया गेलेनो थाखाय निलामयाव लादों। बे हान्जाखौ भिरात कहलीआ केप्टेन महेर हान्जा दैदेनफिनगोन। जेराव खोला आफ्रिकानि गोखों गेलेगिरि ए बि डि बिलीयासआबो फेगो सिजनआव गेलेफिनो थाखाय थियारि जादों। बिसोर सानै गेदेमा क्रिकेटारजों मोनसे हान्जायावनो गेलेनो मोनगोनखौ गोजोन्नाय फोरमायदों अस्ट्रेलियानि अल राउन्डर बेटसमेन मेक्सुयेलआ। बिथाड बुडोदि, भिरात कहलीनिफ्राय गेलेनाय आरो हान्जा दैदेनयनि सायाव गोबां सोलोनो खाबु




मोनगोन। मेक्सुयेलआ बुंवावोदि, भिरात कहलीआ बे समाव मोनथाम क्रिकेट गेलेनायावबो साबसिन गेलेगिरि जानानै दं। टेस्ट आरो टि-20 नि आइ सि सि वर्ल्ड रेकिंयाव टप-10 सारियाव जायगा लानानै दं। गेलेनाय समाव जायखि-जाया थासियावनो मेचखौ गोखोडे लाखिनायाव भिरात कहलीआ जाफुंसारनाय सासे गेलेगिरि होन्नानै बो

फोरमायो। मुलुगनि गुबुन सासे गोखों केप्टेन जानायजों लोगोसेनो सासे गोखों गेलेगिरिबो होन्नानै मेक्सुयेलआ फोरमायो। भिरात कहलीनि हान्जा दैदेनयाव फेगो 14 थि सिजननि आइ पि एलआव गेलेनो खाबु मोनगोनखौ लानानै गोजोन्नाय आरो थुलुंगाखांनयबो फोरमायदों अस्ट्रेलियानि गेलेगिरिया। मख'नो गोनांदि, बे सिजननि आइ पि एलनि थाखाय

जानाय गेलेगिरिफोरनि निलामयाव अस्ट्रेलियानि ग्लेन मेक्सुयेलआ 3 थि बयनिखुडबो बांसिन धोनजों बायजानाय धोन जानो हादों। मेक्सुयेलखौ आर सि बि हान्जाया 14.25 कौटि रडव बायदों। बेजों लोगोसेनो खोला आफ्रिकानि गोखों बलार आरो अल राउन्डर कृष मरिसखौबो आइ पि एलनि जारिमिनयाव बयनिखुडबो बांसिन धोनजों बायदों। बे गेलेगिरिखौ रजस्थान स्वेल्सआ गासै 16.25 कौटि रडव गेलेनो निलाम खालामदों। बेजों लोगोसेनो अल राउन्डर काइल जेमिसनखौ आर सि बिआ 15 कौटि रडव बायदों। बेबायदिनो मुलुगनि माखासे गोखों गेलेगिरिया भारतनि आइ पि एलआव गुबुन गुबुन हान्जाजों गोबां धोननि गोरोबथाजों गेलेनो थाखाय थियारि जानानै दं।

ला-लीगानि मेचयाव एटलिटिक' माद्रिदआ देरहानायजों पइन्टनि फारिलाइयाव आवगायबावदों

माद्रिद, 2 मार्च: स्पेइनि हादतनि गेजेराव थांनाय माखासे समनिफ्रायनो फारियै सोलिबोबाय थांनाय ला-लीगा फुटबल लीगनि थांनाय हरनि समाव गेलेनाय गुबुन मोनसे गोनां मेचखौ एटलिटिक माद्रिद आरो भिल्ला रियेल क्लबनि गेजेराव मोगा-मोगि गेलेयो। बे गेलेनाय मेचनि फिथाइ बायदियै एटलिटिक माद्रिदआ गोब्राबजों 2-0 गलयाव फेजेन्तो हायो आरो बे मेचखौ देरहानो हानायजों पइन्टनि फारिलाइयाव आरोबाव आवगायबावनानै सेथि सारियाव थायो। बे गेलेनाय मेचखौ देरहानो थांखिजों मोनैबो क्लबनि गेजेराव सिगांनिफ्रायनो गोखों गेलेनाया जागायजेनो आरो गेलेनायनि गिबि हाफ टाइमआव भिल्ला रियेल क्लबनि गेलेगिरि अलपन्साआ गावनो गाव गलखौ जोसन्ना लानायजों माद्रिद क्लबआ 1-0 गलजों आवगायनो हायो। बेनि उनाव नैथि हाफ टाइमनि गेलेनाय जागायजेनफिन्यायजों गेलेनायनि माखासे समनि गेजेराव गेलेगिरि फिलिक्सआ नैथि गलखौ जोसन्तो हानायव जाफुंसारो आरो हान्जाया बे मेचखौ 2-0 गलयाव देरहानो हानानै पइन्टनि फारिलाइयाव बयनिखुडबो



गोजौसिन सारियाव आवगायनो हायो। गुबुन फारसेथिं बांसिलना क्लबआ थांनाय शनिवारखालि गेलेनाय मेचयाव सेभिला क्लबखौ 2-0 गलयाव फेजेन्तो हाबावो। बे मेचखौ देरहानानै बांसिलनाया पइन्टनि फारिलाइयाव दासिम 3 थि जायगा लानानै दं। गुबुन मोनसेबाव ला-लीगानि मेचखौ बिग' आरो बल्लादलिड क्लबनि गेजेराव 1-1 गलजों इ गेलेयो। बेनि अनगायैबो गेलेबावनाय ला-लीगानि मेचखौ ग्रेनेडाआ 2-1 गलनि फारागथियाव सेल्सि क्लबनि हेंथायै देरहानो हायो।

दानिया, 80 बोसोर बैसोनि देरसिन गागि नोगोरारि/ जर'खायै नोर्जिया/कभिड सन्देह गोनां एबा कभिड सन्देरजानाय भटारआ गोसो जायोब्ला परटेल बेलटनि हेफाजाबै न'निफ्रायनो भट होनो हागोन

परटेल बेलटनि खाबुखौ माबोरै मोनफुंनो हागोन?

1. बि.एल.अ.या भटारनि न'-न' थांनानै बिसायख'थिनि नटिफिकेसन फोसावजानायनि सान 5 नि गेजेराव फर्म नं 12 डि रानानै हागोन
2. बि.एल.अ.या बिसायख'थिनि नटिफिकेसन फोसावजानायनि सान 5 नि गेजेराव गोसो गोनां भटारआ सुफुंनानै दोन्नाय 12 डि फर्मखौ बुथुमगोन
3. पलिं बिबानगिरि एबा बि.ए.अ.या परटेल बेलट बुथुमनो थाखाय गोसो गोनां भटारखौ लोगो हमगोन
4. भटारफोरनिफ्राय भट होखांनय परटेल बेलट बुथुमनाय हाबाखौ भट होनायनि सिगांनो फोजोबगोन

गिबि खोलेबनि बिसायख'थिनि थाखाय 12 डि आर'ज लाइ गथायनायनि जोबथा अक्ट 6 मार्च 2021

गुवारै मिबथिनो बेसेन नाडै
भटार हेल्पलाइन नम्बर 1950 याव डायेल खालाम

आसिम जज्जाग जेठानात जाअरि अधिकार

@ceoassam chiefelectorlofficerassam @ceo_assam

गाहाय बिसायख'थि बिबानगिरि, आसामजों राइजो-राजाफोर मिबथिनायनि फोसावनाय

JANASANYOG/DF/2476/20
Enclave/CEO/03/2021